


補
益
補

漢
晉
戎
兵
要
兵
志
井
註
略
志







漢兵補志
井註

撰子文錢

中華民國二十六年十二月初版

發行人 王長沙雲南正路五

印刷所

發行所

各商務印書館

長沙南正路五

補漢兵志序

宋 陳元粹撰

漢兵志永嘉白石先生往爲大都授時所著予少小執經師從曾備討閱因獲聞纂集之大旨初藝祖開基次第剗削五代僭僞收其精兵聚于京師天下既平而已聚之兵不可復散遂定都汴京以便漕運始倚兵以固國而不及天下之形勢嘗自歎曰不出百年天下民力殫矣固已逆知後世以兵爲病也然當時徒見兵聚而精不知其後兵聚而不可復用蓋自太宗既平太原欲遂取幽燕而不克自是歲有契丹之擾瀆淵之役僅能罷兵爲和而西夏之叛終莫得其要領尋至永樂之釁極爲中原之變所在戰卒望風奔潰訖未聞一戰之獲渡江以來稍自振刷和議既成尋復廢弛數十年來天下無事衣糧犒賞不可少殺生息長養而貪將黠吏得以浸容其姦故老弱者難汰虛籍者難覈安坐無事則驕驕則難用久聚而法弛則悍悍則難制生息繁而衣給有限則貧貧則思亂征行調發之日稀不閑臨陣決戰之術則怯怯則棄甲曳兵而走今自京師禁衛江上諸屯諸州廂禁邊上戍守往往以百萬爲額而未嘗可用也夫以天下不及承平之半而養百萬無用之卒凡今天下嗷嗷行一切之術網羅天下之遺利以竭生民之力而楮幣茶鹽之法日益敝壞皆爲此也抑可久而不知變乎於虜此先生所以拳拳有意于漢家之遺制也謹按漢制調民有限無常役之歲則與今日老弱虛籍者異

按補兵制首當知用民之目蓋漢法民二十始傅二十三爲正卒五十六免通爲三十六年自始傅爲更卒歲一月止于三十有六月卽今廂軍備斷役者是爲衛士止一歲卽今禁衛扈從者是爲材官騎士止一歲卽今禁軍備戰守者是戍邊三日卽今更遣戍卒者是漢之用民止此四條夫以民之爲生除其少與老中閒三十有六年之間藉其強壯之日而用之又不過兩歲及三十有六月加以戍邊通爲五歲有三日耳其勢老弱虛籍自無所容于其閒夫兵不常役則佚而不怨在官之日少則有餘力而不疲故漢兵所向未嘗敗衄橫行於四夷而匈奴卒于摧敗破滅款塞奉國珍來朝闕下近古未嘗有也其與今日常有四夷之憂異矣

有事檄召事已罷歸無聚食之費則與今日竭民力以養兵者異

按高帝十年征陳豨上曰吾以羽檄徵天下兵未有至者是年淮南王布反檄諸侯兵上自將以擊布孝武云吾初卽位不欲出虎符發兵郡國齊哀王謀發兵中尉魏勃給召平曰王欲發兵非有漢虎符驗也高帝紀五年夏五月旣誅項羽兵皆罷歸家則知漢法兵皆散于郡國有事則以虎符檄召而用之事已皆罷歸家無復養兵之費矣

衣齋自備無供億之勞則與今日春秋衣賜不時激賞者異

按賈誼傳曰漢淮南吏民繇役往來長安者自悉而補中道衣敝錢用諸費稱此貨殖傳曰長安中列侯封君行從軍旅齋貸子錢家則知漢兵雖以征行調發衣齋猶自備而況無事而歲科和買供給春

秋二衣乎

近地調發無遠征之勞。

已詳補志并註。

不立素將無擁兵專制之虞。

按唐杜佑通典云。兵制可採唯有漢氏。或有四夷侵軼。則從中命將。發五營騎士。六郡良家。武師。樓船。伏波。下瀨。咸因事立稱。舉事則省。雖衛霍勳高績重。身奉朝請。兵皆散歸。

都試課殿最。無驕蹇難用之患。

已詳補志并註。

故自文帝以來。與民休息。經常不耗。則減田租。弛山澤。文帝二年。賜天下民田租之半。十三年。除田租稅。

後元六年。弛山澤。

尋至太倉之粟。陳陳相因。都內之錢。貫朽而不可校。皆不養兵之效也。誠使稍取漢制。斟酌劑量。參而行於今日。以救其極敝。不十年間。國力可紓。民力可裕。其效猶指諸掌。夫亦何憚而不爲嗟夫。先生乃老矣。方力疾匱休。築室深山中。尙羊物外。以書史泉石自娛。將終身焉。此志邈矣。顧每以予講肆滋久。警策蘊奧。粗可與語理道者。其素相期待者遠矣。然予亦偃蹇半世。安于靜退。未嘗出位而思。豈敢輒言兵事。而先生憂國之心。與所著書要。不可不與有志於斯世者共之也。雖然。其事大體重。關繫宏遠。要在成順致

利不燄民聽其條目次第固非一端初先生更欲編次漢調兵弛役尺籍伍符金鼓旗幟及凡兵閒調度別爲一書未果蓋漢兵最近古其規模尤精密而史闕其文姑採摭羣書先志其大節而其織悉未能盡載此書也先生名文子字文季世居樂邑白石山下因自號白石山人云嘉定甲戌謹序

補漢兵志綱目

凡用民見下四項

漢法民二十始傅止非調民爲之也。

更卒

更卒曰踐更止雖罷癃不免。

衛士

衛士屬衛尉止有加恩焉。

材官騎士

材官騎士屬郡都尉止蓋長從募士多而郡國之兵壞矣。

戍邊

天下之人皆直戍邊止漢之用民殆不過此。

復

而天子推恩則有復其身者止無以給中外繇役矣。

郎

所謂天子之衛，則光祿勳所領諸郎是也。止其郎員悉省于先漢矣。

南北軍

其次則有南軍、有北軍。止其所領士徒亦甚多矣。

三輔兵

三輔之兵，中尉主之。止則中尉所專職，唯徵循而已。

城中兵

凡城中屬長安令止，蓋京師之兵大略具此。

滎陽屯兵

其外則滎陽屯兵止，無常屯之兵也。

郡國兵

郡國之兵，則材官騎士是也。止非虎符，不得輒發。

邊兵

唯當寇之邊，特異內郡止，蓋其權重矣。

部都尉

部都尉部戍卒乘障塞止，不以從征也。

農都尉

農都尉武帝初置。止其制邊守塞。大略如此。

屬國

然猶困于匈奴之強。止所謂以蠻夷制蠻夷者也。

元書初不立此綱目。予慮學者未明。復表出之。非本旨也。元粹謹書。

補漢兵志并註

宋 白石先生錢氏撰

漢法民二十始傅

高紀二年蕭何發關中老弱未傅者悉詣軍服虔曰傅音附孟康曰古者二十而傅三年耕有一年儲故二十三而後役之如淳曰律年二十三傅之疇官各從其父疇學之師古曰傅著也言著名籍給公家徭役也景紀二年令天下男子年二十始傅師古曰舊法二十三今此二十更爲異制當考本末二十三爲正卒

漢儀注民年二十三爲正一歲爲衛士一歲爲材官騎士習射御騎馳戰陣漢舊儀民年二十三爲正

一歲爲衛士一歲爲材官騎士水處爲樓船

自始傅爲更卒歲一月正卒爲衛士一歲材官騎士一歲

食貨志董仲舒曰秦法月爲更卒已復爲正一歲屯戍一歲力役三十倍于古漢興循而未改師古曰更卒謂給郡縣一月而更者也正卒謂給中都官者也率計今人一歲之中三十倍多于古也昭紀元鳳四年逋更賦勿收如淳曰此漢初因秦法而行之也後遂改易有謫乃戍邊一歲耳案正卒比更卒爲正也更卒給郡縣非正卒仲舒所謂已復爲正謂二十三歲後應爲衛士材官者顏說以爲給中都

官者非也。給中都官卽以衛士分戍中都官耳。事見魏相傳循而未改。謂更卒歲一月正卒二歲大略與秦相似耳。其實漢人無一歲屯戍一歲力役之事也。

戊邊歲三日

參

如淳曰。天下人皆直戍邊三日。律所謂備戍。

五十六免

漢儀注。年五十六衰老乃得免爲庶人就田里。

至于治城郭築隄防轉輸力役皆官予庸直非調民爲之也。

惠紀三年發長安六百里內男女十四萬六千人城長安三十日罷。武紀元光三年發卒十萬救決河食貨志耿壽昌奏言故事歲漕關東穀四百萬斛以給京師用卒六萬人食貨志天子爲伐胡故盛養馬馬之往來食長安者數萬匹卒掌者關中不足乃調旁近郡案食貨志通西南夷道作者數萬人千里負擔餽餉率十餘鍾致一石散幣于邛僰以輯之又築衛朔方轉漕甚遠費數十百鉅萬府庫並虛又溝洫志成帝河平三年治河卒非受平價者爲著外繇六月則知漢人治城郭築隄防轉輸力役皆官予庸直非調民爲之也。如養馬至調旁近郡蓋更卒歟。

更卒曰踐更

昭紀元鳳四年如淳曰更有三品有卒更有踐更有過更古者正卒無常人皆當迭爲之一月一更是

爲卒更也。貧者欲得雇更錢者，次直者出錢雇之月二千，是爲踐更也。天下人皆直戍邊三日，亦名爲更律。所謂蘇戌也。雖丞相子亦在戌邊之調，不可人人自行三日戍。又行者當自戍三日，不可往便還。因便住一歲一更，諸不行者出錢三百入官，官以給戍者，是爲過更也。律說：卒踐更者居也，居更縣中五月乃更也。後從尉律：卒踐更一月休十一月也。案：更卒非正卒也。人直一月猶踐雇而去，故曰踐更。踐更卽更卒也。若雇人爲之，當隨其月緩急貴賤爲之直，謂之平賈。漢錢重，不得定爲二千也。若不直而入錢于官，是爲更賦也。

秦爵不更，不爲更卒。左右中更主領更卒。

百官表爵四不更，十二左更，十三中更，十四右更。師古曰：不更言不豫更卒之事。左右中更主領更卒，部其役使也。

其番上尉主之。

昭紀元鳳四年，如淳曰：尉律卒踐更一月，郭解傳解出人皆避，有一人獨箕踞視之。解乃陰請尉史曰：是人吾所重，至踐更時脫之，每至直更數過吏弗求怪之，問其故，解使脫之。箕踞者乃肉袒謝罪。

郡國役使過律若過員，皆坐免。

功臣表信武侯靳亭、祝阿侯高成、孝文後三年皆坐事國人過律免。案過律如滿一月當代而過役之類。功臣表東茅侯劉到子告增。二字校孝文十六年坐事國人過員免。師古曰：事謂役使之員數也。按過

員謂當給郡國者有員數。其餘則出更賦。過員則更賦減矣。

其不役而收其直。謂之更賦。雖罷癃不免。

昭紀元鳳四年。三年以上逋更賦未入者。皆勿收。後漢書虞詡傳。永平章和中。州郡以走卒錢給貸貧人。王莽下令云。漢氏常有更賦。罷癃咸出。高紀二年。如淳曰。律高不滿六尺二寸以下爲罷癃。按更卒給郡國歲一月。不役者官收其庸。謂之更賦。其輕重未詳。唐庸法歲役二旬。不役者收其庸日三尺。

衛士屬衛尉

百官表。衛尉秦官掌宮門衛屯兵。後漢志。衛尉掌宮門衛士宮中徼循事。高后紀。令平陽侯告衛尉母內相國產殿門景武功臣表。李壽坐爲衛尉居守擅出長安界送海西侯至高橋。又使吏殺人誅霍光傳。地節三年徙霍光女婿度遼將軍未央衛尉范朋友爲光祿勳。徙光女婿長樂衛尉鄧廣漢爲少府。及兩宮衛將屯兵悉易以所親信許史子弟代之。

其寺在宮內。

漢舊儀。衛尉寺在宮內。

周垣爲區廬。衛士分居之。

百官表。胡廣云。衛士於周垣下爲區廬。區廬者若今之仗宿屋矣。元紀初元五年師古曰。衛尉有八屯。有長樂建章甘泉衛尉不常置。

百官表長樂建章甘泉衛尉皆掌其宮職略同不常置高后紀朱虛侯章馳斬長樂衛尉呂更始武五子傳戾太子出武庫兵發長樂宮衛宣紀元平元年太后歸長樂宮長樂宮初置屯衛案長樂衛尉自漢初有之今云初置者疑戾太子敗後罷之至此方置太初元年起建章宮宣紀元康元年置建章衛尉元紀初元三年罷甘泉建章宮衛令各就農

衛尉之屬有衛司馬衛候左右都候有公車司馬衛士旅貢令丞

百官表屬官有公車司馬衛士旅貢三令丞衛士三丞又諸屯衛候司馬二十二官皆屬焉二十二官未詳

司馬候主徼巡宿衛

元紀初元五年師古曰衛尉有八屯衛候司馬主衛士徼巡宿衛每面各二司馬故謂宮之外門爲司馬門元紀初元五年令從官給事宮司馬中者得爲大父母父母兄弟通籍應劭曰司馬主武兵禁之意也籍者爲二尺竹牒記其年紀名字物色縣之宮門案省相應乃得入也後漢志宮掖門每門司馬一人比千石本注云南宮南屯司馬主平城門北宮門蒼龍司馬主東門元武司馬主元武門北屯司馬主北門北宮朱雀司馬主南掖門東明司馬主東門朔平司馬主北門凡七門凡居宮中者皆有口籍于門之所屬宮名兩字爲鐵券按漢書作印文符案省符乃內之若外人以事當入本官長吏爲封棨傳其有官位出入令御者言其官又胡廣云諸門部各陳屯夾道其旁掌兵以示威武按漢書云其旁當兵以示威

比交戟以遮妄出入者蓋寬饒傳初拜爲衛司馬未出殿門斷其禪衣令短離地冠大冠帶長劍躬按行士卒廬室視其飲食居處有疾病者身自撫循臨問加致醫藥遇之甚有恩及歲盡交代上臨饗罷衛卒衛卒數十人皆叩頭自請願復留共更一年以報寬饒厚恩元紀初元五年衛司馬谷吉使匈奴鄭吉傳以侍郎遷衛司馬馮奉世傳以衛尉持節又持節上有使字送大宛諸國客至伊脩城案左氏春秋晉悼公以祁奚爲中軍尉魏絳爲司馬張老爲候奄蓋秦晉間以尉司馬候爲軍官

左右都候巡宮中及天子有所收考

後漢志左右都候各一人六百石丞各一人本註曰主劍戟士徼循宮及天子有所收考蔡質漢儀曰宮中諸官官字按漢書無有効奏罪左都候執戟戲車縛送付詔獄在官按漢書作候大小各付所屬以馬被覆此其職也

皆與中尉相表裏

漢舊儀宮司馬諸隊都候領督盜賊屬執金吾司馬掖門殿門此衛士皆屬衛尉案百官表中尉屬官無衛司馬候左右都候此云屬金吾者蓋執金吾徼巡宮外實相表裏所謂聯事

公車司馬令受章奏及徵詣公車者

三輔黃圖未央宮四面皆有公車劉向傳章交公車後漢志公車司馬令一人六百石丞尉各一人掌宮南闕門凡吏民上章四方貢獻及徵詣公車者丞選曉諭掌知非法尉主闕門兵禁戒非常獻帝起

居注曰建安八年議郎衛林爲公車司馬令位隨將大夫舊公車令與都官長史位從將大夫自林始衛士令領衛士

後漢志南宮衛士令一人六百石丞一人掌南宮衛士北宮衛士令一人六百石丞一人掌北宮衛士旅賁令蓋主衛士之驍勇者以備非常

師古曰旅衆也賁與奔同言爲奔走之任也後漢志中興省旅賁令案周官旅賁氏中士二人下士十有六人徒八人掌執戈盾夾王車而趨漢倣此名以衛士爲之中興以公車司馬衛故省之歟

凡衛尉太尉所部

漢官目錄太僕光祿勳衛尉三卿太尉所部

時以領屬衛將軍

外戚傳高后八年以梁王爲相國居南軍按原本作後軍今據漢書改正文紀卽日夕入未央宮夜拜宋昌爲衛將軍領南北軍二年始罷衛將軍軍案南軍卽衛士張安世傳地節三年罷車騎將軍屯兵更爲衛將軍兩宮衛尉城門北軍兵屬焉

其轉置送迎常二萬人

武紀建元元年詔曰衛士轉置送迎常二萬人其省萬人鄭氏曰去故置新常二萬人漢舊儀饗衛士萬五千人應邵漢官衛尉衛士六十人南宮衛士令衛士五百三十七人北宮衛士令衛士四百七十

二人右都候衛士四百一十六人。左都候衛士三百八十三人。南宮北屯司馬衛士百二人。北宮門蒼龍司馬衛士四十人。元武司馬衛士三十八人。北屯司馬衛士三十八人。北宮朱雀司馬衛士百二十四人。東明司馬衛士百八十人。朔平司馬衛士百一十七人。案衛尉所管衛士數諸離宮寢園及中都官不在其中。然後漢制度大率減于西京。

有分戍諸離宮寢園及中都官者。

韋元成傳昭靈后武哀王昭哀后孝文太后孝昭太后衛思后戾太子戾后各有寢園與諸帝合凡三十所用衛士四萬五千一百二十九人養犧牲卒不在數中魏相傳爲河南太守後人有告相賊殺不辜事下有司河南卒戌中都官者二三千人遮大將軍自言願復留作一年以贖太守罪師古曰來京師諸官府爲戌卒若今衛士上番分守諸司

雖時有減省然用民多矣。

賈山傳陛下卽位減外繇衛卒元帝時貢禹言諸離宮及長樂宮衛可減其太半以寬繇役天子下其議省建章甘泉宮衛卒減諸侯王廟衛卒省其半其始至丞相迎勞

漢舊儀衛士初至未入君侯到都國外賜勞吏士歲盡罷遣天子臨饗勸以農桑有加恩焉

漢舊儀正月五日大置酒饗衛士蓋寬饒傳及歲盡交代上臨饗罷衛士丞相衡與中二千石大鴻臚賞等會坐于殿門下後漢志饗遣故衛士儀百官會位定謁者持節引故衛士入自端門衛司馬執幡鉦護行行定侍御史持節慰勞以詔問所疾苦受其章奏所欲言畢饗賜作樂觀其角抵樂闋罷遣勸以農桑

材官騎士

刑法志漢興天下既定踵秦置材官於郡國京師有南北軍之屯漢官儀高祖命天下郡國選能引關蹶張材力武猛者以爲輕車騎士材官樓船

屬郡都尉

百官表郡尉掌佐守典武職甲卒秩比二千石有丞秩皆六百石景帝中二年更名都尉諸侯王國中尉掌武職

以歲八月太守都尉令長丞爲會都試水處爲樓船

漢舊儀常以八月太守都尉令長丞尉會都試材官騎士習騎馳戰陣按聚珍版漢官舊儀云長相丞尉會都試材官騎士督射御騎馳戰陣課殿最水處爲樓船亦習戰射行船

令丞尉亦各統其縣守尉不得專也

霍義傳義爲東郡太守王莽居攝義心惡之遂與東郡都尉劉宇嚴鄉侯劉信信弟武平侯劉璜結謀

于是以九月都試日斬觀令因勒其車騎材官士大抵金城、天水、隴西安定、北地、河東、上黨、上郡多騎士三河、潁川、沛郡、淮陽、汝南、巴蜀多材官高紀十一年淮南王反上乃發上郡、北地、隴西、車騎、巴蜀材官及中尉卒三萬人軍霸上武紀元鼎六年發隴西、天水、安定、騎士及中尉河南河內卒十萬人征西羌宣紀神爵元年西羌反發三輔中都官徒弛刑及應募佽飛、射士、羽林、孤兒、胡越騎三河、潁川、沛郡、淮陽、汝南材官金城、隴西、天水、安定、北地上郡騎士羌騎詣金城

江淮以南多樓船士

武紀元鼎五年南越相呂嘉反遣伏波將軍路博德出桂陽下湟水樓船將軍楊僕出豫章下瀆水歸義越侯嚴漢書增按越字據爲戈船將軍出零陵下離水甲爲下瀆將軍下蒼梧皆將罪人江淮以南樓船十萬人食貨志元鼎五年南粵反因南方樓船士二十餘萬人擊之朱買臣傳東越數反朱買臣爲會稽太守詔到郡治樓船備糧食水戰具嚴助傳淮南王上書曰前時南海王反陛下先臣使將軍聞忌將兵擊之會天暑多雨樓船卒水居擊櫂未戰而疾死者過半其興發量地遠近若宣帝以沛郡淮陽汝南征西羌蓋罷民矣事見上

郡國不擅斥騎士

趙廣漢傳坐擅斥除騎士乏軍興數罪腰斬歸古曰斥除謂逐遣之非教士不得徵發

武五子傳燕王旦賜策曰母乃廢備非教士不得從徵

以功推遷得至將相

申屠嘉傳以材官蹶張從擊項籍。爰盎傳君以材官蹶張遷爲隊帥。積功至淮陽守。趙充國傳始爲騎士。以六郡良家子補羽林。霍去病傳騎士孟己有功。賜爵關內侯。

然其試騎士有爲伍分左右部置軍假司馬千人或至坐死。按有爲伍一作有馬伍

韓延壽傳蕭望之案延壽在東郡時試騎士五騎爲伍分左右部軍假司馬千人及治飾車甲三百萬以上。于是望之劾奏延壽上僭不道。延壽竟坐棄市。馮唐傳夫士卒盡家人子起田中從軍安知尺籍伍符。

而諸侯王不得領庫兵飭武備

燕王旦傳旦詐言以武帝時受詔得職吏事修武備備非常。于是下令羣臣曰寡人親奉明詔職吏事領庫兵飭武備。按諸侯王不得領庫兵蓋七國敗後稍禁抑之。

武帝之後有選募有罪徒其選募曰勇敢

武紀天漢四年發天下七科謫及勇敢士遣李廣利等擊匈奴。李陵傳將勇敢五千人教射張掖酒泉

以備胡。天漢二年，召陵欲使爲貳師將，輜重陵叩頭自請曰：臣所將屯邊者皆荆楚勇士奇材劍客也。力扼虎，射命中，願得自當一隊。

曰：犇命。

昭紀始元元年，遣呂破胡募吏民及發犍爲蜀郡犇命擊益州應劭曰：舊時郡國皆有材官騎士以赴急難。今夷反，常兵不足以討之，故權選取精勇聞命犇走，故謂之犇命。

曰：伉健。

宣紀本始二年，大發興選郡國吏三百石伉健習騎射者皆從軍。趙充國傳奏云：四月草生，發郡騎及屬國胡騎伉健各千倅，馬什二就草。

曰：豪吏。

王溫舒傳會宛軍發詔徵豪吏。溫舒匿其吏華成及人有變告溫舒受員騎錢，它姦利事，罪至族，自殺。曰：應募。

宣紀神爵元年，發三輔、中都官徒弛刑。據漢書增二字

及應募佽飛、射士、趙充國傳罷騎兵留弛刑應募及淮陽、汝南步兵與吏士私從者，馮奉世傳復發募士萬人，拜韓安國爲建威將軍。常惠傳家貧，自奮應募。淮南王傳時有欲從軍者，輒詣長安，雷被即願奮擊匈奴。太子數惡被，王使郎中令斥免。欲以禁後，元朔五年，被遂亡之長安，上書自明，上遣漢中尉

宏卽訊驗王中尉還以聞公卿治者曰淮南王安壅關求奮擊匈奴者雷被等格明詔當棄市詔不許曰私從

趙充國傳願罷騎兵留弛刑應募及淮陽汝南步兵與吏士私從者李廣傳負私從者不與其罪徒曰謫民曰惡少

武紀太初元年遣李廣利發天下謫民西征大宛天漢四年發天下七科謫及勇敢士遣李廣利等擊匈奴張晏曰吏有罪一亡命二贅婿三賈人四故有市籍五父母有市籍六大父母有市籍七凡七科李廣利傳太初元年發屬國六千騎及郡國惡少年數萬人以往又赦囚徒捍寇盜發惡少年及邊騎歲餘而出又發天下七科適及載糒給貳師案七科謫張說非也七謫蓋擇其罪之輕者凡七科以謫發之其名不詳見武帝雖暴未至如始皇之甚也李廣利傳伐宛罷後十一歲征和三年貳師復出五原擊匈奴無天漢四年擊匈奴事紀傳必有誤昭紀元鳳五年發三輔及郡國惡少年吏有告勸亡者屯遼東

曰亡命

武紀元封六年蓋州昆明反赦京師亡命令從軍遣郭昌將以擊之昭紀發吏有告勸亡者曰徒曰弛刑

昭紀元鳳元年武都氐人反遣馬適建等將三輔太常徒皆免刑擊之宣紀神爵元年發三輔中都官

徒弛刑李奇曰弛廢也謂若今徒解鉗釦赭衣置任輸作也曰罪人

高紀十一年淮南王反上赦天下死罪以下皆令從軍武紀元鼎五年南越相呂嘉反遣路博德楊僕等將罪人江淮以南樓船十萬人越馳義侯遣別將巴蜀罪人發夜郎兵

曰應募罪人

武紀元封二年楊僕苟彘將應募罪人擊朝鮮昭紀元鳳六年募郡國徒築遼東元菟城

至于中興併尉職罷都試

後漢志建武六年省諸郡都尉併職太守無都試之役省關都尉唯邊郡往往置都尉及屬國都尉稍有分縣治民比郡安帝以羌犯法三輔有陵園之守乃復置右扶風都尉京兆虎牙都尉

材官騎士還復民伍

世祖紀建武七年三月詔曰今國有衆軍並多精勇宜且罷輕車騎士材官樓船士及軍假吏令還復民伍

蓋長從募士多而郡國之兵壞矣

馬援傳建武二十四年武陵五溪蠻反援將十二郡募士及弛刑四萬餘人擊之應劭漢官曰自郡國罷材官騎士之後官無警備實啓戎心一方有難三面救之發興雷震煙蒸電激一切取辦黔首囂然

不及講其射御。用其戒誓。一旦驅之以卽強敵。是以每戰常負。王旅不振。張角懷挾妖僞。遐邇搖蕩。八州並發。煙炎絳天。牧守梟裂。流血成川。爾乃遠徵三邊。殊俗之兵。非我族類。忿鷙縱橫。多偃良善。以爲己功。財貨糞土。哀夫民氓。遷流之咎。見出在茲。不教而戰。是謂棄之跡其禍敗。豈虛也哉。

天下之人皆直戌邊。謂之過更。

高紀二年。興關中卒乘邊塞。婁敬傳。齊人漢五年。戍隴西。蓋寬饒傳。家貧。身爲司隸子。常步行自戍北邊。後漢安紀。永初四年。詔三輔除三年逋租。過更口算芻稊。

行者兼代他人。一歲而更。

史記大事記。高后五年。令戌卒歲更。量錯傳。令遠方之卒。守塞一歲而更。不如選常居者。如淳曰。天下之人。皆直戌邊三日。亦名爲更。律所謂繇戌也。雖丞相子亦在戌邊之調。不可人人自行。三日戌又行者。當自戌三日。不可往便還。因便住。一歲一更。諸不行者。出錢三百入官。官以給戍者。是謂過更也。按過更。言三日之戌。過之卽更。猶更卒一月。名踐更也。安紀。除逋租過更錢之逋者。非謂出錢入官。乃名過更。

視秦人閭左之戌寬矣。

陳勝傳。發閭左戌漁陽者九百人。應劭曰。秦時以謫發之。名謫戌。先發吏有過及贅墮賈人。後以嘗有市籍者。又後以大父母父母嘗有市籍者。戍者曹輩盡復入閭取其左發之。未及取右而秦亡。

邊無事。又時減外繇。

賈山傳。陛下卽位減外繇。衛卒霍去病傳。渾邪王降。減隴西北地上郡戍卒之半。以寬天下繇役。宣紀。五鳳四年。以邊塞無寇。減戍卒什二。昭紀。元平元年。日者省用罷不急官。減外繇。案史記大事記。文十三年除戍卒。今諸傳自文帝後。但言減之耳。未詳。

或以官奴婢代戍。

賈禹傳。又諸官奴婢十萬餘人。戲游亡事。宜免爲庶人。稟食令代關東戍卒。乘北邊亭塞。候望。武帝時始有以謫發者。

武紀。天漢元年。發謫戍屯五原。食貨志。算繕令。匿不自占。占不悉者。戍邊一歲。

成卒至邊。蓋領屬部都尉。

地理志。邊郡有部都尉百官表無之。疑領戍卒。

其賜外繇著外繇者皆計庸直得受之其人也。

卜式傳。賜式外繇四百人。蘇林曰。外繇謂戍邊也。一人出錢三百。謂之過更。式歲得十二萬錢也。溝洫志。成帝河平元年。治河卒著外繇六月。師古曰。以卒治河有勞。雖執役日近。皆得比繇。戍六月也。著謂著于簿籍也。後二歲。河復決治。六月乃成。治河卒非受平賈者。爲著外繇六月。按外繇無六月者。外繇歲不過三日。則六月可當六十人。今著之。俟調發時得受之。令庸除已當戍三日。他皆爲已有。猶卜式

傳賜外縣四百人也。

漢之用民殆不過此而天子推恩則有復其身者若三老

高紀二年舉民年五十以上有脩行能帥衆爲善置以爲三老鄉一人擇鄉三老一人爲縣三老與縣令丞尉以事相教復勿繇戍

若孝悌若力田

惠紀四年舉民孝悌力田者復其身

若吏卒從軍至平城者

高紀八年令吏卒從軍至平城及守城邑者皆復終身勿事

若博士弟子

儒林傳武帝詔爲博士官置弟子五十人復其身

若通一經者

儒林傳元帝好儒能通一經者皆復

若五大夫

食貨志量錯奏云令民入粟受爵至五大夫以上迺復一人此其與騎馬之功相去遠矣按錯云入粟受爵至五大夫以上乃復一人蓋承舊制爵九級至五大夫乃復耳鄭註周禮鄉大夫貴者皆舍若今

宗室及關內侯皆復。自後漢改法爵二十級。至關內侯乃復也。

若車騎馬。
食貨志。鼂錯奏云。民有車騎馬者。復卒三人。西域傳。武帝詔。當今務在禁苛暴。止擅賦。力本農。脩馬復令以補闕。母乏武備而已。

若癱不可事。

周禮。鄉大夫老者疾者皆舍註云。疾者。謂若今癱不可事者。復之。漢律。民年二十三。博之疇官。高不滿六尺二寸以下爲疲癃。

有復其家。若豐沛。

高紀。十二年。謂沛父兄。其以沛爲朕湯沐邑。復其民。世世無有所與。沛父兄爲豐請。乃併復豐。比沛。若吏二千石從入蜀漢者。

高紀。十二年。詔云。吏二千石入蜀漢定三秦者。皆世世復。吾于天下賢士功臣。可謂亡負矣。若軍吏卒非七大夫以下者。

高紀。五年。詔軍吏卒非七大夫以下。皆復其身及戶。勿事。

若吏六百石及嘗佩將軍都尉印將兵。及二千石官印者。

惠紀。詔吏六百石以上。父母妻子與同居。及故吏嘗佩將軍都尉印將兵。及佩二千石官印者。家唯給

軍賦他母有所與。按軍賦卽算賦。

若民徙塞下者。

量錯傳今令遠方之卒守塞一歲而更不知胡人之能不如選常居者家室田作且以備之募民之欲往者皆賜高爵復其家賈誼傳今西邊北邊之郡雖有長爵不輕得復按邊郡與西羌匈奴接境雖高爵應復之人亦不免操兵爲守戰備言匈奴爲邊郡害如此非漢法不與之復也。

若宗室

文紀四年復諸劉有屬籍家無所與周禮鄉大夫國中貴者皆舍鄭注云若今宗室及關內侯皆復是也。

若功臣後

宣紀地節二年詔大司馬大將軍博陸侯復其後世疇其爵邑世世母有所與功臣表元康四年復高

帝功臣絳侯周勃百三十六人家子孫令奉祭祀世世勿絕其無嗣者復其次○按宣紀元康元年表必有誤按功臣表皆作元康四年致本紀四年有功臣通後黃金事表或因此而誤記也

至于關中卒從軍者

高紀二年關中卒從軍者復家一歲

諸侯子在關中者

高紀五年詔諸侯子在關中者復之十二歲其歸者半之流民還歸者

宣紀地節三年詔流民還歸者假公田貸種食且勿算事

八十九十者子若孫

賈山傳九十者一子不事武紀建元元年詔民年九十以上已有受鬻法爲復子若孫令得身帥妻妾遂其供養之事周禮鄉大夫老者皆舍鄭謂若今八十九十復羨卒

民產子者

高紀七年詔民產子復勿事二歲

有大父母父母之喪者復身若家皆有期限

宣紀地節四年詔百姓或遭衰絰凶災而吏繇事使不得葬傷孝子之心朕甚憐之自今諸有大父母父母之喪者勿繇事使得收斂送終盡其子道

而復算復租尤不輕予

宣紀地節三年流民還歸者勿算事高紀二年蜀漢民給軍事勞苦復勿租稅二歲

武帝始令民入粟復

食貨志桑宏羊請令民入粟甘泉各有差以復終身

入奴婢復

食貨志兵連不解府庫並虛乃募民能入奴婢得以終身復

買爵至千夫復而徵發之士益鮮

食貨志法既益嚴吏多廢免兵革數動民多買復及五大夫千夫徵發之士益鮮案秦爵五大夫第九武功爵千夫第七蓋武帝創武功爵每級加舊爵二等欲民貴之故千夫比五大夫皆得復除也無以給中外繇役矣

元紀永光三年用度不足民多復除無以給中外繇役

所謂天子之衛則光祿勳所領諸郎是也

百官表郎中令秦官掌宮殿掖門戶有丞武帝太初元年更名光祿勳期門羽林皆屬焉漢舊儀殿外門署屬衛尉殿內郎署屬光祿勳文紀皇帝卽日夕入未央宮夜拜張武爲郎中令行殿中楊惲傳擢爲諸吏光祿勳親近用事居殿中廉潔無私郎官稱公平

凡入郎者以吏二千石以上任其子若弟

漢儀注吏二千石以上視事滿三年得任同產若子一人爲郎哀紀卽位除任子令張安世陳咸劉向王崇馯元霍義以父任爲郎爰盎霍光楊惲以兄任爲郎

以明經

高相傳。子康以明易爲郎。召信臣傳。以明經甲科爲郎。眭宏傳。從贏公受春秋。以明經爲議郎。孔光傳。經學尤明。年未二十舉爲議郎。翟方進傳。以射策甲科爲郎。二三歲舉明經。遷議郎。劉向傳。宣帝初立。穀梁春秋。召向受穀梁。講論五經于石渠。復拜爲郎中。給事黃門。以孝廉。

董仲舒傳。臣愚以爲宜。使諸列侯郡守二千石各擇其吏民之賢者。歲貢各二人。以給宿衛。王吉、王駿、蓋寬、饒、鮑宣、京房、韋元成、杜鄴、師丹、馮奉世、子譚、駿。皆以孝廉爲郎。馮唐以孝廉爲郎中署長。以射策甲科。

蕭望之、翟方進、馬宮、何武、王嘉。皆以射策甲科爲郎。以博士弟子高第。

儒林傳。武帝時太常奏博士弟子一歲皆輒課能通一藝以上。補文學掌故缺。其高第可以爲郎中。太常籍奏。平帝時增元士之子。得受業如弟子。歲課甲科四十人爲郎中。

以上書若賦。

主父偃傳。是時徐樂、嚴安亦俱上書言世務。上召見。拜偃、樂、安皆爲郎中。枚乘傳。乘子臯。按此三字元爲增入。召入待詔。臯因賦殿中詔。使賦平樂館。善之。拜爲郎。時使民入羊。入奴婢。入穀。入財。或買武功爵。皆得補郎。郎選衰焉。

食貨志。武帝時。府庫竝虛。迺募民能入奴婢。得以終身復爲郎。增秩及入羊爲郎。始于此。後四年。置武功爵。以顯軍功。多用超等。大者封侯卿大夫。小者郎。吏道雜而多端。則官職耗廢。及孔僅爲大司農。始令吏得入穀補官郎。至六百石。其後所忠又言。世家子弟富人。或鬪雞走狗馬弋獵博戲。亂齊民。迺徵諸犯令。相引數千人。名曰株送徒。入財者得補郎。郎選衰矣。卜式傳。是時富豪皆爭匿財。唯式尤欲助費。上以式終長者。乃召拜式爲中郎。賜爵左庶長。田十頃。布告天下。初式不願爲郎。上曰。吾有羊在上林中。欲令子牧之。式旣爲郎。布衣草蹠而牧羊。黃霸傳。以待詔入錢賞官。補侍郎。謁者。

凡郎有議郎。

後漢志。凡大夫議郎。皆掌顧問應對。無常事。唯詔命所使。百官表。議郎中郎秩比六百石。侍郎比四百石。郎中比三百石。

有中郎。

東方朔傳。復爲中郎。上爲賓太主。置酒宣室。使謁者引內董偃。是時朔陞載殿下。辟戟而前曰。董偃有斬罪三。安得入。上默然曰。吾業以設飲。後而自改。朔曰。不可。有詔止。更置酒北宮。引董君從東司馬門。有侍郎。

東方朔傳。上以爲常侍郎。遂得愛幸。又設客難曰。官不過侍郎。位不過執戟。有郎中。

司馬遷傳爲郎中奉使西征巴蜀。

有外郎。

惠紀卽位賜民爵一級中郎郎中滿六歲爵三級四歲二級外郎滿六歲二級中郎不滿一歲一級外郎不滿二歲賜錢萬蘇林曰外郎散郎也按惠帝卽位賜爵唯中郎郎中外郎不言議郎侍郎又董仲舒云今長吏多出於中郎郎中吏二千石子弟則知漢初郎官考其實唯有三等諸言郎者外郎也中郎者內郎也郎中者在二郎之中也自武帝後始于中郎增議郎侍郎非議郎皆更直執戟宿衛殿門

後漢志凡郎皆更直執戟宿衛殿門出充車騎唯議郎不在直中

而內郎守黃門者爲黃門郎

漢舊儀黃門郎屬黃門令日暮入對青瑣門拜名曰夕郎

議郎中郎侍郎郎中多至千人

百官表議郎中郎侍郎郎中皆無員多至千人

而又有期門羽林騎期門亦至千人

百官表期門掌執兵送從武帝建元三年初置比郎無員多至千人平帝元始元年更名虎賁郎蔡質漢儀虎賁五百人無常員多至千人

或曰三百人。

漢舊儀期門騎者，隴西攻射獵，及能用五兵材力三百人。

羽林七百人。

百官表羽林掌送從次期門。武帝太初元年初置，名曰建章營騎，後更名羽林騎。漢舊儀羽林從官七百人。

孤兒無數。

漢舊儀諸孤兒無數。

或曰羽林郎百一十八人，左右騎各八九百人。

蔡質漢儀羽林郎百一十八人，無常員。漢官儀羽林左監主羽林左騎八百人，右監主羽林右騎九百人。

皆以三輔六郡良家子補期門羽林。

東方朔傳建元三年徵行始出八九月中，與侍中常侍武騎及待詔隴西北地良家子能騎射者，期諸殿門，故有期門之號。自此始漢舊儀期門騎者，隴西攻射獵，及能用五兵材力三百人，行出會待期門下，從射獵，無員秩。比郎從官名曰期門騎，地理志武帝還天水、隴西安定北地、上郡、西河、凡六郡補羽林，以材力爲官，名將多出焉。後漢志羽林郎無員，掌宿衛侍從，常選漢陽、隴西安定北地、上郡、西河、凡

六郡良家補本武帝以便馬從獵還宿殿陛巖下室中故號巖郎漢舊儀羽林從官士百人取三輔良家子自給鞍馬按漢用六郡良家補羽林期門蓋三輔園陵賴爲藩蔽故取其子弟以備宿衛猶高帝封趙壯士四人各千戶也天水永平十七年更名漢陽趙充國傳隴西人以六郡良家子善騎射補羽林甘延壽傳北地人少以良家子善騎射爲羽林投石拔距絕于等倫嘗超踰羽林亭樓由是遷爲郎試弁爲期門

及從軍死事之子孫養羽林號孤兒父死子代

百官表又取從軍死事之子孫養羽林官教以五兵號曰羽林孤兒漢舊儀諸孤兒無數父死子代皆武帝時擊胡死子孫不能自活養羽林官比郎從官從車駕不得冠置令一人名曰羽林騎孤兒常輓大行喪車王莽以卿大夫博士直弟子輓大行喪車爲羽林郎按荀綽晉百官表注曰虎賁諸郎皆父死子代漢制也未詳

皆掌執兵送從而羽林又有黃頭郎習櫂船

鄧通傳以櫂船爲黃頭郎師古曰刺船之郎皆著黃帽故號黃頭枚乘傳說吳王曰漢知吳有吞天下之心也遣羽林黃頭循江而下襲大王之都蘇林曰羽林黃頭郎蓋習水戰者

宣帝發期門羽林從征殆輕用之矣

宣紀神爵元年西羌反發三輔中都官徒弛刑及應募佽飛射士羽林孤兒胡越騎三河潁川沛郡淮

陽、汝南材官、金城、隴西、天水、安定、北地、上郡、騎士羌騎、詣金城。趙充國傳：神爵元年，充國子右曹中郎將印，將期門、佽飛、羽林孤兒、胡越騎爲支兵，案印所將爲支兵，即神爵元年所發詣金城者也。紀不言發期門誤也。馮奉世傳：擊西羌，請益兵，乃發三輔河東、宏農、越騎、迹射、佽飛、轂者、羽林孤兒及呼速矣囉種。

中郎分五官左右

百官表：中郎有五官左右三將，秩比二千石。

郎中分車戶、騎，仍有左右

百官表：郎中有車戶、騎三將。漢儀注：郎中令主郎中，左右車將主左右車郎，左右戶將主左右戶郎。李廣傳：景帝初爲騎郎將，蓋寬饒傳：遷諫大夫行郎中戶將事，勑奏張安世子不下殿門。楊惲傳：召戶將尊，欲令戒飭富平侯。

與期門羽林皆有將

百官表：中郎有五官左右三將，秩皆比二千石。郎中有車戶、騎三將，秩皆比千石。期門、平帝元始元年更名虎賁郎，置中郎將，秩比二千石。宣帝令中郎將騎都尉監羽林，秩比二千石。後漢志：虎賁中郎將比二千石，主虎賁宿衛。羽林中郎將比二千石，主羽林郎。

光祿勳以歲時科第其行能

元紀永光元年詔丞相御史舉質樸淳厚遜讓有行者光祿勳歲以此科第郎從官後漢志光祿勳考其德行而進退之

大將軍肄習射御戰陣

武五子傳將軍都郎羽林道上稱蹕師古曰都大也謂大會試之漢光祿掣令諸當試者不會都所免之霍光傳言光出都肄郎羽林師古曰謂總閱試習武備也

將以兵法部屬之

爰盎傳爲中郎將上曰將軍怯耶按中郎將稱將軍則部屬諸郎當以兵法猶周官諸子奏免其有罪而薦舉其高第者

張釋之傳爲騎郎十年不得調欲免歸中郎將爰盎知其賢惜其去乃請徙釋之補謁者楊惲傳遷中郎將謁者有罪過輒奏免薦舉其高第有行能者至郡守九卿郎官化之莫不自厲絕請謁貨賂之端令行禁止宮殿之內翕然同聲

中興以五官左右虎賁郎將併將中郎侍郎郎中

後漢志五官中郎將主五官郎左中郎將主左署郎右中郎將主右署郎虎賁中郎將主虎賁宿衛皆有中郎侍郎郎中羽林中郎將主羽林郎而廢車戶騎三將

後漢志省車戶騎凡三將。

其郎員悉省于先漢矣。

百官表謁者員七十人。後漢志謁者三十人。按後漢制度大率省約。以謁者推之。大率可見也。

其次則有南軍。有北軍。南軍則衛士是也。
外戚傳高后八年。以梁王產爲相國。居南軍。以趙王呂祿爲上將軍。居北軍。臨崩戒祿產曰。今王呂氏大臣不平。我卽崩。恐其爲變。必據兵衛宮。謹母送喪。爲人所制。高后紀。勃將北軍。然尚有南軍。丞相平召朱虛侯章佐勃。勃令章監軍門。令平陽侯告衛尉。母內相國產殿門。產不知祿已去北軍。入未央宮。欲爲亂。殿門弗內。徘徊往來。平陽侯馳語太尉勃。勃未敢誦言誅之也。乃謂朱虛侯章曰。急入宮衛帝。章從勃請卒千人。入未央宮掖門。見產廷中。逐產殺之。郎中府吏舍廁中。勃曰。所患獨產。今已誅。天下定矣。按外戚傳及本紀。考祿產本末。則南軍當是衛士。以其在北軍之南。故謂南軍。蓋漢初未有他兵。也是歲衛尉營陵侯劉澤。

北軍在未央北。爲軍壘垣。置中壘校尉。以一校守之。

百官表中壘校尉掌北軍壘門內。并屯騎等。凡八校尉。皆武帝初置。刑法志。漢興。天下初定。踵秦置材官于郡國。京師有南北軍之屯。至武帝平百粵。內增七校。外有樓船。晉灼曰。凡八校尉。胡騎不常置。故云七校。按漢初有南北軍。則中壘校尉掌北軍壘門。當是高帝所置。諸呂反。太尉不得入北軍。則中壘

校尉所守也。武帝所置自屯騎以下凡七校尉百官表以八校尉皆武帝所置誤矣。北軍當在未央北中壘蓋中北軍而屯也。漢制每一校少者七百人多者千二百人。

有事屯兵其中事已輒罷。

文紀皇帝卽日夕入未央宮夜拜宋昌爲衛將軍領南北軍二年詔曰朕旣不能遠德故憫然念外人之有非是以設備未息今縱不能罷邊屯戍又飭兵厚衛其罷衛將軍軍黃霸傳守京兆尹發騎士詣北軍馬不適士勅乏軍興。

武帝時有諸校尉則常屯矣。

胡建傳監軍御史與護軍諸校列坐堂皇上。

北軍有監軍御史。

胡建傳監軍御史穿北軍壘垣以爲賈區。

或曰監北軍使者。

劉屈釐傳征和二年戾太子召監北軍使者任安發北軍兵安受節已閉軍門不肯應太子金日磾傳莽何羅與通及小弟安成矯制夜出共殺使者發兵按監北軍使者與監軍御史職號略同自天漢後

更名。

有護軍都尉皆監其軍察舉非法。

陳平傳。拜平爲都尉。使參乘典護軍。諸軍盡譖曰。大王一日得楚之亡卒。未知高下。而卽與共載。使監護長者。或譖平曰。今大王尊官之令護軍。臣聞平使諸將。金多者得善處。金少者得惡處。平反覆亂臣也。漢王召讓平。平對云云。漢王乃謝厚賜平。拜以爲護軍中尉。盡護諸將。自初從至天下定後。常以護軍中尉從百官表。護軍中尉。秦官。平帝元始元年。更名護軍都尉。按漢書無都尉二字。衛青傳。元朔五年。青將六將軍擊匈奴還。帝詔御史曰。護軍都尉公孫敖三從大將軍擊匈奴。常護軍。傳校獲王。按護軍不屬大將軍師。公孫敖從青擊匈奴。故傳諸校。傳音附。

有軍正。正丞掌軍法。

百官表。高帝五年。軍正陽咸延爲少府。昭紀。始元五年。大鴻臚田廣明。軍正王平。擊益州。衛青傳。軍正閔長史安。李廣利傳。擊大宛還。詔曰。軍正趙始成功最多。爲光祿大夫。胡建傳。孝武天漢中。守軍正丞。時監軍御史爲姦。穿北軍壘垣以爲賈區。建欲誅之。乃約其走卒曰。我欲與公有所誅。吾言取之。則取。斬之。則斬。于是當選士馬日。監軍御史與護軍諸校列坐堂皇。上建從走卒趨至堂皇下。拜謁。因上堂皇。走卒皆上。建指監軍御史曰。取彼走卒前曳下堂。建曰。斬之。遂斬御史。護軍諸校皆愕驚。不知所以建亦已有成奏。王懷中。遂上奏曰。臣聞軍法立武以威衆。誅惡以禁邪。今監軍御史公穿軍垣以求賈利。私買賣。以~~貨~~市。不立剛毅之心。勇猛之節。亡以帥先士大夫。尤失理不公。用文吏議。不至重法。黃帝李法曰。壁壘已定。穿竊不繇路。是謂姦人。姦人者殺。臣謹按軍法曰。正亡屬將軍。將軍有罪。以

聞二千石以下行法焉丞於用法疑執事不諉上臣謹斬以聞按史記司馬穰苴傳監軍莊賈後至穰苴召軍正問曰軍法期而後至者云何對曰當斬遂斬莊賈以徇蓋軍正古官主軍法者非有事不統于太尉諸將軍

高后紀太尉欲入北軍不得入胡建傳軍法曰正無屬將軍而護軍之屬大司馬自武帝始也

百官表護軍都尉武帝元狩四年屬大司馬成帝綏和元年居大司馬府比司直趙充國傳昭帝時武都氏人反充國以大將軍護軍都尉擊定之又充國爲後將軍擊西羌豪靡忘自歸充國遺還論種人護軍以下皆爭之王莽傳大司馬護軍廉襄奏言安漢公云云

武帝增置七校曰屯騎曰步兵曰越騎曰長水曰胡騎曰射聲曰虎賁

百官表屯騎校尉掌騎士步兵校尉掌上林苑門屯兵越騎校尉掌越騎長水校尉掌長水宣曲胡騎又有胡騎校尉掌池陽胡騎不常置射聲校尉掌射聲士虎賁校尉掌輕車皆武帝初置有丞司馬校尉秩皆二千石刑法志武帝平百粵內增七校外有樓船督灼曰百官表凡八校尉云七校者胡騎不常置按胡騎雖云不常置而自武宣後屢見諸傳至光武始併長水豈得不在數中所謂七校者蓋中壘係北軍非武帝初置自屯騎而下爲七校也

各掌其兵以備宿衛

三輔黃圖漢有長水、中壘、屯騎。按屯騎二字從三輔黃圖增入虎賁、越騎、步兵、射聲、胡騎、宿衛王宮周廬直宿。後漢志、屯騎、越騎、步兵、長水、射聲、校尉皆亦掌宿衛兵。

蓋選募精勇及胡越內附之人比之期門羽林無復更代而京師始有長從坐食之兵矣。有事時發五校或胡越騎。

李陵傳、武師將軍伐大宛使陵將五校兵隨後趙充國傳子印將期門佽飛羽林孤兒胡越騎爲支兵元紀永光二年馮奉世擊西羌任千秋別將五校竝進奉世復請益兵乃發三輔河東宏農越騎迹射佽飛般者羽林孤兒按奉世復請益兵云云見傳非元紀語也

而越騎尤重率以所親信領之騎尤重按註云云當作而疑脫胡字而胡越

金日磾傳金敞子涉領三輔胡越騎師古曰胡越騎之在三輔者若長水長楊宣曲之屬是也霍光傳兄孫山奉車都尉侍中領胡越兵光薨帝封山爲樂平侯以奉車都尉領尚書事諸領胡越兵按漢書作騎

悉易以所親信許史子弟

中興省中壘以胡騎虎賁并長水射聲而置北軍中候以監五營

後漢光武紀建武七年省長水射聲二校尉官九年置青巾左校尉官十五年復置屯騎長水射聲三校尉官改青巾左校尉爲越騎校尉是也後漢志中興省中壘但置中候以監五營胡騎并長水虎賁主輕車并射聲

始謂五校爲北軍。

吳漢傳漢薨發北軍五校輕車介士送葬按霍光傳發材官輕車北軍五校士軍陳至茂陵謂北軍及五校也東都省中疊無北軍中候營遂通謂五校爲北軍

而胡越騎或以他軍充之其名則猶故也按註云云當作而越騎或以他軍充之疑衍胡字

後漢志越騎校尉如淳曰越人內附以爲騎也晉灼曰取其材力超越也按紀光武改青巾左校尉爲越騎校尉臣昭曰越人非善騎所出晉灼爲允按刑法志武帝平百粵增七校又諸傳多言胡越騎則胡越非超越明矣蓋光武以他軍充越騎其官則仍舊名也

至於少府有佽飛

百官表少府屬官有左弋居室令丞武帝太初元年更名佽飛佽飛掌弋射有九丞兩尉臣瓚曰官有一令九丞在上林苑中結繒繳弋鳧鴈歲萬頭以供祀宗廟如淳曰呂氏春秋荆有茲非得寶劍于干將渡江中流兩蛟繞舟茲非拔寶劍赴江刺兩蛟而殺之荆王聞之仕以執圭後世以爲勇力之官茲佽音相近師古曰亦因取其便利輕疾若飛故號佽飛

水衡有輯濯

百官表水衡都尉屬官有輯濯令丞如淳曰輯濯船官也師古曰輯讀與楫同音集濯直孝反皆所以行船也

武帝以後時備興發其所領士徒亦甚多矣。

宣紀神爵元年發三輔中都官徒弛刑及應募佽飛射士詣金城趙充國傳子中郎將印將期門佽飛孤兒胡越騎爲支兵劉屈鰲傳征和二年戾太子反屈鰲矯制發輯灌士以予大鴻臚商邱成是也三輔之兵中尉主之中尉掌宮外戒司非常水火之事

百官表中尉秦官掌徼循京師武帝太初元年更名執金吾秩中二千石後漢志執金吾一人秩中二千石掌宮外戒司非常水火之事月三繞行宮外及主兵器

常以緹騎二百人巡京師

漢官曰執金吾緹騎二百人五百二十人輿服導從光滿道路世祖歎曰仕宦當作執金吾

與衛尉相表裏

胡廣曰衛尉巡行宮中則金吾徼于外相爲表裏以擒姦討猾

其督捕姦盜則宮司馬都候屬焉

漢舊儀宮司馬諸隊都候領督盜賊屬執金吾案百官表衛候司馬及左右都候皆屬衛尉蓋領督盜賊之事則以屬中尉歟

有大事發兵屯衛事已輒罷

高紀十一年淮南王反上乃發上郡北地隴西車騎巴蜀材官及中尉卒三萬人爲皇太子衛軍霸上

文紀三年上幸甘泉發中尉材官屬衛將軍軍長安其征伐四夷不輕用也。

武紀元鼎六年發隴西天水安定騎士及中尉河南河內卒十萬人遣將軍李息郎中令徐自爲征西羌。

其官有兩丞司馬候千人又中壘寺互武庫都船及式道左右中候皆屬焉。

百官表有兩丞候司馬千人按師古注云千人官名屬官有中壘寺互武庫都船四令丞都船武庫有三丞中壘兩尉又式道左右中候候丞左右京輔都尉尉丞兵卒皆屬焉初寺互屬少府中屬主爵後屬中尉武帝置左右京輔都尉分掌三輔而屬之中尉則中尉所事職唯徵循而已。

百官表元鼎四年置三輔都尉都尉丞各一人。

凡城中屬長安令有左右尉其外有廣部明部尉凡四尉。

漢舊儀長安城中皆屬長安令置左右尉城南置廣部尉城西北置明部尉凡四尉。

自戾太子敗乃置城門校尉掌城門屯兵。

武紀征和二年太子亡始置城門屯兵。

有司馬十二城門候。

百官表城門校尉秩二千石掌京師城門屯兵有司馬十二城門候師古曰八屯各有司馬門各有候。

蕭望之署小苑東門候亦其比也。

其後以近臣領之。

張安世傳罷車騎將軍屯兵更爲衛將軍兩宮衛尉城門北軍兵屬焉至開幕府如將軍。

外戚元后傳王音代鳳爲大司馬車騎將軍而平阿侯譚位特進領城門兵讓不受後上悔廢平阿侯譚不輔政而薨也乃復進成都侯商以特進領城門兵置幕府得舉吏如將軍商代音爲大司馬衛將軍而紅陽侯立位特進領城門兵

而函谷關亦置關都尉屯兵守之蓋京師之兵大略具此。

百官表關都尉秦官武帝初置魏相傳大將軍霍光責過相曰幼主新立以爲函谷京師之固武庫精兵所聚故以丞相弟爲關都尉子爲武庫令其外則滎陽屯兵臨事輒發無常屯之兵也

高紀十二年帝崩呂后與審食其謀曰諸將故與帝爲編戶民北面爲臣心常鞅鞅今乃事少主非盡族是天下不安酈商見審食其曰誠如此天下危矣陳平灌嬰將十萬守滎陽樊噲周勃將二十萬定燕代此聞帝崩諸將皆誅必連兵還鄉以攻關中陳平傳平恐呂后及呂嬃怒乃馳傳先去逢使者詔平與灌嬰屯滎陽平受詔立復馳至宮惠紀七年發車騎材官詣滎陽太尉灌嬰將高后紀八年崩上

將軍祿相國產、顓兵秉政，因謀作亂。齊悼惠王子朱虛侯章在京師，欲與太尉勃、丞相平爲內應，以誅諸呂。齊王遂發兵，產祿等遣大將軍灌嬰將兵擊之。嬰至滎陽，使人諭齊王與連和，待呂氏變而共誅之。文紀三年，濟北王興居聞帝之代，欲自擊匈奴，乃反。發兵欲襲滎陽，于是詔罷丞相兵，以柴武爲大將軍，將十萬衆擊之。祁侯繪賀爲將軍，軍滎陽。吳王濞傳七國反，天子遣曲周侯酈寄擊趙，將軍樊布擊齊，大將軍竇嬰屯滎陽，監齊趙兵。

郡國之兵則材官騎士是也。漢創秦故，始令天下縣邑城。

高紀六年，令天下縣邑城。

而材官騎士歲時講肄，然其給事郡國，唯更卒衛士而材官騎士非虎符不得輒發。

齊悼惠王傳：哀王謀發兵，中尉魏勃給召平曰：「王欲發兵，非有漢虎符驗也。」

唯當寇之邊，特異內郡。自漢初置諸侯王，

高紀五年立番君芮爲長沙王，立盧綰爲燕王。六年立兄宜信侯喜爲代王，以太原郡三十一縣爲韓國，徙韓王信都晉陽。七年廢代王喜，立子如意爲代王。九年廢趙王敖，徙代王如意爲趙王。諸侯王表諸侯比境，周市三垂，外接胡越。

以信臣監邊。

盧綰傳：陳豨以郎中封爲列侯，以趙相國將監趙代邊兵。韓信傳：陳豨爲代相，監邊辭信，信掣其手曰：

公之所居天下精兵處也。而公陛下之信幸臣也。案高紀九年廢趙王敖。徙代王如意爲趙王。蓋豨始爲代相及如意王趙復爲趙相故二傳不同耳。

兵精地大隨卽叛亡。

高紀六年韓王信降匈奴十年代相國陳豨反上曰豨嘗爲吾使甚有信代地吾所急故封豨爲列侯以相國守代十二年陳豨降將言豨反時燕王盧綰使人之豨所陰謀上使審食其迎綰綰稱疾食其言綰反有端使樊噲周勃將兵擊綰詔曰燕王綰與吾有故愛之如子聞與陳豨有謀吾以爲亡有故使人迎綰綰稱疾不來謀反明矣

其後徙代地置雲中

高紀十一年上擊陳豨還雒陽詔曰代地居常山之北與夷狄爲鄰按漢書云與夷狄邊趙乃從山南有之遠數有胡寇難以爲國頗取山南太原之地益屬代代之雲中以西爲雲中郡則代受邊寇益少矣

而長沙燕代皆割其南北邊爲郡

諸侯王表長沙燕代雖有舊名皆亡南北邊矣如淳曰長沙之南更置郡燕代以北更置緣邊郡其所

有饒利兵馬器械三國皆失之也

既又募民徙塞下爲築室屋復其家不輸賦

量錯傳錯上言今使胡人數處轉牧行獵于塞下或當燕代或當上郡北地隴西以候備塞之卒卒少

則入陛下不救則邊民絕望而有降敵之心救之少發則不足多發遠縣繼至則胡又已去聚而不罷爲費甚大罷之則胡復入如此連年則中國貧苦而民不安矣陛下幸憂邊境遣將吏發卒以治塞甚大惠也然令遠方之卒守塞一歲而更不知胡人之能不如選常居者家室田作且以備之以便爲之高城深塹具蘭石布渠答復爲一城其內城間百五十步要害之處通川之道調立城邑毋下千家爲中周虎落先爲室屋具田器乃募臯人及免徒復作令居之不足募以丁奴婢贖臯及輸奴婢欲以拜爵者不足迺募民之欲往者皆賜高爵復其家予冬夏衣廩食能自給而止郡縣之民得買其爵以自增至卿其亡夫若妻者縣官買予之人情非有匹敵不能久安其處塞下之民利祿不厚不可使久居危難之地胡人入驅而能止其所驅者以其半予之縣官爲贖其民如是則邑里相救助赴胡不避死非以德上也欲全親戚而利其財也此與東方之戍卒不習地勢而心畏胡者功相萬也以陛下之時徙民實邊使遠方亡屯戍之事塞下之民父子相保亡係虜之患利施後世名稱聖明其與秦之行怨民相去遠矣上從其言募民徙塞下錯復言陛下幸募民相徙以實塞下使屯戍之事益省輸將之費益寡甚大惠也下吏誠能稱厚惠奉明法存恤所徙之老弱善遇其壯士和輯其心而勿侵刻使先至者安樂而不思故鄉則貧民相慕而勸往矣臣聞古之徙遠方以實廣虛也相其陰陽之和嘗其水泉之味審其土地之宜觀其草木之饒然後營邑立城製里割宅通田作之道正阡陌之界先爲築室家有一堂二內門戶之閉置器物焉民至有所居作有所用此民所以輕去故鄉而勸之新邑也爲置巫

醫以救疾病。以脩祭祀。男女有昏。生死相卹。墳墓相從。種樹畜長。室屋完安。此所以使民樂其處而有長居之心也。臣又聞古之制。邊縣以備敵也。使五家爲伍。伍有長。十長一里。里有假士。四里連連有假五百十連。一邑。邑有假候。皆擇其邑之賢材。有護習地形知民心者。居則習民于射法。出則教民于應敵。故卒伍成于內。則軍正定于外。服習以成。勿令遷徒。幼則同遊。長則共事。夜戰聲相知。則足以相救。晝戰目相見。則足以相識。驩愛之心。足以相死。如此而勸以厚賞。威以重罰。則前死不還踵矣。

不給衛士材官

漢官儀。邊郡不給衛士材官。

又以令徒姦猾吏民於邊。以扞寇虜。

武紀。元狩五年。徙天下姦猾吏民於邊。

有征伐。則將其兵以從將軍。

朱買臣傳。上拜買臣會稽太守。受詔將兵與橫海將軍韓說等俱擊破東越。趙充國傳。虜絕轉道。詔將八校尉與驍騎都尉金城太守合疏捕山閒虜充國計。欲以威信招降罕开及劫略者。時上已發云云。與武威張掖酒泉太守各屯其郡者。合六萬人矣。又云。上即拜酒泉太守辛武賢爲破羌將軍。將兵六千一百人。敦煌太守快將二千人。昭紀。元鳳三年。遼東烏桓反。以中郎將范明友爲度遼將軍。將北邊七郡。郡二千騎擊之。

雖高爵得復然不能不興發也。

賈誼傳令西邊北邊之郡雖有長爵不輕得復五尺以上不輕得息。

太守將萬騎行障塞。

漢舊儀邊郡太守將萬騎行障塞。

治亭徼。

食貨志上北出蕭關行獵新秦中以勒邊兵而歸新秦中或千里無亭徼于是誅北地太守以下○按

上下文當是元鼎中紀下書按事見食貨志武紀不載

注本不誤按語非也

置長史司馬候千人蓋其權重矣。

漢舊儀邊郡太守置長史一人丞一人治兵民當兵行長史領置部都尉千人司馬候農都尉皆不治民百官表邊郡又有長史掌兵馬秩六百石後漢志郡置太守一人丞一人郡當邊戍者丞爲長史王國之相亦如之獨奉世傳馮譚以孝廉爲郎補天水司馬嚴助傳發兵會稽會稽守欲距法不爲發助乃斬一司馬諭意指。

部都尉部戌卒乘障塞有東西部或南北部皆因秦故隨地要害稍損益之。

地理志朔方五原雲中定襄代郡遼東有東西中部都尉酒泉有東西北部都尉鴈門上谷遼西有東西部都尉會稽有南西部都尉隴西樂浪有南部都尉北地武威廣漢上郡有北部都尉西河有南西

北部都尉敦煌有中部都尉按百官表有長史典兵馬則部都尉蓋部戌卒守塞歟乘塞列隧不過數千人

趙充國傳充國奏云竊見北邊自敦煌至遼東萬一千五百餘里乘塞列隧有吏卒數千人虜數大衆攻之而不能害

有障塞尉各領其士

武紀太初三年遣光祿勳徐自爲築五原塞外列城西北至盧朐強弩都尉路博德築居延秋匈奴入定襄雲中按雲中二字據漢書增殺掠數千人行壞光祿諸亭障晉灼曰地理志從五原櫛陽縣北出石門障卽得所築城按何焯校漢書云得宋本同誤師古曰漢制每塞要處別築爲城置人鎮守謂之候城此卽障也後漢志邊縣有障塞尉掌禁備羌夷犯塞張湯傳博士狄山言湯詐忠於是上作色曰吾使生居一縣曰不能復曰居一郡聞山自度辯窮且下吏曰能迺遣山乘鄣至月餘匈奴斬山頭而去

要以屯衛邊民不以從征也

案諸紀傳無戌卒從軍攻戰事

農都尉武帝初置領內郡卒屯田塞下因以備虜

百官表農都尉武帝置後漢志武帝時置農都尉主屯田殖穀

其制邊守塞大略如此然猶困于匈奴之強每聞虜入則發兵屯邊公卿大夫罷于奔命遠者至六月輒罷歸

周亞夫傳文帝後六年匈奴大入邊以宗正劉禮爲將軍軍霸上祝茲侯徐厲爲將軍軍棘門河內守周亞夫爲將軍軍細柳以備胡月餘三軍皆罷武紀元光元年衛尉李廣爲驍騎將軍屯雲中中尉程不誠爲車騎將軍屯鴈門六月罷二年御史大夫韓安國爲護軍將軍衛尉李廣爲驍騎將軍太僕公孫賀爲輕車將軍大行王恢爲將屯將軍太中大夫李息爲材官將軍將三十萬衆屯馬邑谷中誘致單于欲襲擊之單于入塞覺之走出六月軍罷

武帝後時有將屯之兵矣

李陵傳爲騎都尉將勇敢五千人教射張掖酒泉以備胡霍去病傳路博德爲強弩都尉屯居延趙充國傳遷中郎將將屯上谷又充國傳將四萬騎屯緣邊九郡師古曰九郡者五原朔方雲中代郡鴈門定襄北平上谷漁陽

自征伐之餘夷狄衰耗於是卽其歸義者處之塞外爲屬國

董錯傳今降胡義渠蠻夷之屬來歸誼者數千人飲食長技與匈奴同可賜之堅甲絮衣勁弓利矢益以邊郡之良騎令明將能知其習俗和輯其心者以陛下之明約將之卽有險阻以此當之武紀元狩二年匈奴昆邪王殺休屠王并將其衆合四萬餘人來降置五屬國以處之霍去病傳減隴西北地上

郡戍卒之半乃分處降者于邊五郡故塞外而皆在河南因其故俗爲屬國原本誤趙充國傳今訂正宣紀五原三年置西北地屬國以處匈奴降者

置屬國都尉領之

百官表典屬國掌蠻夷降者武帝元狩三年昆邪王降復增屬國置都尉丞候千人屬官九譯令地理志天水勇士安定三水上郡龜茲西河美稷五原蒲澤皆屬國都尉治後漢竇融謂兄弟曰張掖屬國精兵萬騎

以備藩衛從征伐

趙充國傳發郡騎及屬國胡騎伉健各千倅馬什二就革功臣表昆侯渠復參以屬國大首渠擊匈奴侯駢侯駒幾以屬國騎擊匈奴捕單于兄侯

而西域有都護

百官表西域都護加官宣帝地節二年初置以騎都尉諫大夫使護西域三十六國有副校尉秩比二千石丞一人司馬候千人各二人西域傳自伐大宛之後西域震懼於是自敦煌西至鹽澤往往起亭而輪臺渠犁皆有田卒數百人置使者校尉領護以給使外國者至宣帝時遣衛司馬使護鄯善以西數國其後匈奴日逐王畔單于將衆來降護鄯善以西使者鄭吉迎之乃使吉并護北道故號曰都護都護督察烏孫康居諸外國動靜有變以聞可安輯安輯之可擊擊之都護治烏壘城去陽關二千七

百三十八里與渠犁田官相近土地肥饒於西域爲中故都護治焉陳湯傳遷西域副校尉與甘延壽俱出湯矯制發城郭諸國兵車師戊己校尉屯田吏士漢兵胡兵合四萬餘人攻斬郅支單于

車師有戊己校尉

百官表戊己校尉元帝初元元年置有丞司馬各一人候五人秩比六百石西域傳元帝復置戊己校尉屯田車師前王庭師古曰甲乙丙丁庚辛壬癸皆有正位唯戊己寄治今所置校尉亦無常居故取戊己爲名也有戊校尉有己校尉一說戊己居中鎮覆四方今所置校尉亦處西域之中撫諸國也案戊己校尉在車師前王庭非寄治又車師在西域東鄰匈奴亦非處西域之中也校尉名戊己其義未詳

監護諸國屯田殖穀以絕匈奴羌道所謂以蠻夷制蠻夷者也

跋

白石先生補兵志。大抵喜漢法之近古，傷後世養兵之費廣，擁兵之權專也。余曩從先生游，得見此書，即手鈔爲家藏。且以訓族里，思與好學之士共之。忽得刊本于同門友瑞昌陳令君，則知令君之志與余同，能以先生之書傳諸遠于天下後世。經生學士尤有補云。嘉定乙亥端午日，門人奉議郎權淮南路轉運判官兼淮南東路提點刑獄公事池陽王大昌書。

大昌于是年九月，鋟板潛廡，益廣其傳。


宋憲五代之弊。收天下甲兵。悉萃京師。名曰禁軍。開寶入籍。十九萬三千。不爲不多矣。至道增至三十
五萬八千。天禧增至四十三萬一千。慶歷增至八十二萬六千。治平以降。迄於元豐。稍爲裁減。尙六十
餘萬。徽宗將一童貫而禁軍闕額二十四萬。靖康之禍。按籍止存三萬人而已。無一夫可驅之戰者。遂
以不支。高宗將一張浚。富平符離之敗。棄師累十萬。乃莫有正其罪者。尙可言兵事乎。樂清錢文子見
南渡兵食之冗濫也。以漢制不失寓兵于農之意。而班史無志。因以補之。書僅一卷。言近而旨遠。辭約
而義該。此非高談性命之學者所能括也。文子字文季。紹熙三年。由上舍釋褐出身。以吏部員外郎兼
國史院編脩官。歷宗正少卿。退居白石山下。自號白石山人。故所輯詩傳及是編。皆以白石著錄。不知
者疑是姜夔書誤矣。卷首有陳元粹序。後有王大昌跋。皆其弟子跋。稱嘉定中銅版於淮南漕廩。予所
鈔者。虞山錢曾藏本也。秀水朱鼎尊識。

右補漢兵志一卷宋樂清錢文子撰門人陳元粹爲之註蓋以補班史之闕而實有慨于南渡後兵食冗濫思復漢制以救其弊其憂國之心深矣當嘉定甲戌乙亥閒瑞昌淮南一再版行閱世既深流傳漸寡予以重值購鈔本於吳江沈氏反覆班書詳加讎比正訛補闕頗于陳註有小補焉錢梓家塾再廣其傳考直齋書錄解題建安王琰器之亦有兩漢兵志一卷又呂夏卿脩唐史別著兵志三篇戒其子弟勿妄傳吾家吏部好藏書就其家苦求得之著錄晁氏讀書志惜未得與此書竝行耳先生字文季號白石山人歷官始末詳具竹垞先生跋中錄次左方不更贅云

乾隆己亥十月旣望得閒居士鮑廷博識



略要戎茲



著光繼戚

舊約要略

本館據學海類編
本排印初編各叢
書僅有此本

莅戎要略

明 東車戚繼光著

行軍條教

一詳啓行至期主將轎門前掌頭號喇叭各將門首俱掌頭號各官軍作飯訖中軍官將塘報預夜派定人持小黃旗一面各弓矢一副腰刀一口于未掌號之先預行吃飯收拾停當俟掌頭號俱到主將門首取齊請定若干步爲一塘聽金邊鳴自主將寓所起爲一塘行足步數留二人爲二塘挨次存留至塘報人盡爲止各且坐息專候兵行挨塘傳去俱行兵止挨塘傳去俱止乃自主將面前爲第一塘起若有樹木人家轉曲不見臨賊將近前一塘必回見後一塘兩旗相應訖方過平處互相瞭應再均步行哨見賊急將旗搖靡不用周身靡而不止緩則只是點旗賊勢衆大圍靡周身如前無路可行水澤窄狹則口傳一層如此各層照前一時俱如此傳賊來一層退至一層如賊不來復又立定如賊再追一層又退一層只退至營前止斷不許靡旗之後不論賊之追不追來一齊擁衆徑回必以軍法示衆掌二號各官軍出在空地劄營將完掌三號主將出至劄營所在以下馬爲始分頭委官于總路專掣後期者捆打一百截耳有故者令從征有功免無功仍補捆打各偏裨俱聽主將認旗靡動俱到主將前會約今日所行向往賊情緩急分路事宜畢打鑼坐地休息少頃掌號一通吹哱囉站起舉號砲三

聲。呐喊三聲。用八方門角旗一副。立四門于前。從吉方點鼓發行。單日左伍執器。右伍挑行李。雙日右伍執器。左伍挑行李。倏有賊近行營。或首或尾。或自中突出。將行李棄于地下。各火兵看守。卽將對伍代執之器。取過手中。便遵號令對敵。中軍若遠。不必候中軍號令。照遇猝警令行。決不可將兵器捆束。甚至沿途挈人扛擡。有被賊裝作土人。將軍器扛擡入竄。而衆兵盡爲所戮者。戰勝畢。卽擇地下方營。休息整伍。樵汲再聽令。路狹挨次。每一營鴛鴦陣。雙人行每十里。舉號砲一聲。卽于腳下立定。鳴鑼坐息一二刻。若賊在三十里外。凡經險阻。塘報傳來。請兵過險。報訖。先發中軍家丁精兵。馳赴險處埋伏。訖。舉號砲一聲。點鼓。兵士過險。凡行營中軍別委的當知。穀官一員。與前哨同行。給五方旗一副。招搖一副。有事方開。阻樹木開青旗。阻水澤開黑旗。阻兵馬開白旗。阻山險開黃旗。阻烟火開紅旗。過所見之物。卽捲凡招搖。如道可一路行立一面。二路平行立二面。三路平行立三面。四路平行立四面。擡營行立五面。後隊遞相口傳。前路旗樹某色。某色招中軍。卽舉變營號砲。及提備號令。

一請火器。凡缺少軍火器械。出征前三日。請給完足。急行亦于前一日。不許臨敵假稱放盡討索。又不許匿無爲有。通以畏避論。

一度水阻。凡渡大水處。先下方營近水塘。報于四遠高處。瞭無伏賊。卽非賊境。亦下營後渡。依次以一哨照法渡之。渡過一旗。卽割成一旗之陣。軍火器械。整列完備。火繩火器。安置得法。卽如賊在前面。就要戰殺一般。然后鳴鑼坐地休息。等候一哨過完。割成哨陣。一司過完。割成司營。一營過完。割成大營。則

一營方聽令而行。以后照此。如塘馬倏然報警。即不必渡。各于兩岸候戰。爭船諱。不循行序。擠衆競先。第一要禁。惟哨隊挨次而渡。一人不致擅先。越后自然不諳爭。平時捆打。臨陣軍法從事。連坐所管。一遇猝警。南方山水林木。叢翳繁紜。只得因地形措陣。因敵情異用。因兵情轉化。無一定之習。安有一定之陣哉。況兵列既長。卒然之變。出于意外。豈能候中軍號令。倘塘報失瞭。如賊自行營腰閒。或前後突出。不及下營者。把總哨官皆得自主。號令卽用急營。凡同行營司俱聽。遇賊把司之令。卽如中軍號令。一般就于所行之地設伏。後營兵一面在遠處據險阻。安營壁。管各火兵作飯備守。

一嚴住宿所至地方。如係安野營。另載野營款下。如當入人家安插各兵。到于城外。或村內空所。前哨第一旗總傳報云。已到某處某城外了。旗總挨傳回來。主將傳來如何。劄營仍俟傳到前哨。第一旗總仍傳回云。知道了。各官每一營爲一路。一字劄定。每一營兵到齊。把總放砲一個。打鑼坐息。俟有若干司營到完。主將吹單哱囉。各哨官隊長纏起身執旗。同火兵進城。或入村尋討歇家。每一隊務在一家安歇。時刻不許相離。別生事端。互相覺察。若一家難容。卽分開壁中。有衙門士大夫家相聞者。卽閒一段。一隊人完然後。再安插一隊。不許攪越。如不隨本隊住者。隊長與各兵以軍法治之。一哨在一街。本哨官隨之一司在一隅。本把總隨之一營。在一面營將隨之。本營各部不許相混。本部各司不許相混。本司各哨不許相混。本旗各隊不許相混。將旗插在各家門首。出城稟云。歇家討完。然后吹哱囉起身。聽放砲三聲。吹喇叭呐喊三聲。點鼓挨營而入。大小將領于各兵所歇信地。適中街面露坐。待各項官兵

都到人家門首立定。聽放砲一個。沿街傳鑼。各軍俱進人家安歇。大小將領方進人家。卽主將亦如之。若未尋歇家。而軍敢先行。及已到門首。未奉軍令而先入者。掣出捆打八十。同伍之人連坐。將官先入者。以違令論。將官歇家一面先尋討已定。只是不入耳。

一申軍令。凡師行動。人一草一木。擅離隊伍。撓越行次。互相鬪毆。恣行詐僞。奸淫婦女。俱以軍法處治。報賊情失實者。斬。搶掠民財者。斬。掩殺撫民者。斬。違錯軍令者。斬。臨陣退縮者。斬。妄殺平人者。斬。虛報功級者。斬。殺匿被擄女子者。斬。互爭首功者。斬。該管人員分別輕重連坐。甚者與正犯同斬。

一劄野營。凡軍行至午炊過再行時。同行營司內各遣熟知營餉官一員。同前哨行至未時。主將擇堪屯營地方。馳高熟視。必山水可據之處。如無山。卽在平野。必進退便利之處。水草方便形勢可觀者。立中軍旗旆。預算同行兵數。相地當爲幾營。每營合若干步。鳴金邊。發立表旗。表旗定。聽舉號砲一聲。吹擺隊五喇叭。表旗麾動。各兵炤旗蠻附下營。營定金鳴喇叭止。如去賊遠。只以拒馬蒺藜爲營中軍立主將帳房。遇晚然燈伏路等項。俱如常操號令。樵汲時。馬軍三馬內。以二人牽一馬出。採三馬之草。同樵汲令收回。日逐輪流。若近賊地方。或係境外。或當疑地。應立木城。度夜須待塘報。四高瞭望。無事。將旗三麾三捲。不再開。以子壁守營。四面兵聽號砲一聲。立黃旗擂鼓。俱分頭向有竹木山林採取。每人立木二株。粗三寸不等。長八九尺皆可。橫木一株。稍細長一丈上下。又竹一株。如竹多木少。則竹代木。木多竹少。只以竹爲蓮花簽。及柵外地釘。如無竹。則以硬木削尖爲釘。以細軟木削尖爲蓮花簽。以軟草

爲繩縛柵再舉號砲一聲麾黃旗收回俱單人身挾每人分地一尺立二木相接爲城完再照前發兵每隊一半每名取小木一根稻草一束一半收木草瓶搭窩鋪每隊一間用草苫蓋及墊地便于坐臥吹打開營門放樵汲飲馬等項一如常操號令若出多入少非被傷捕必係逃走或有暴病該營司遣的當丁塘領令箭出營覓之若出少入多非係錯數必夾來奸細該營便當挨查子營不樹柵候外圍探完營定只探窩鋪竹木每人帶探中軍所用木一株立小樓一座以便于瞭望每把總將餘木亦各搭一小瞭望樓于營四角可容四五人

一限蔬水每日五更盡擂鼓已畢聽掌第一號各起梳洗聽掌第二號各兵通赴木城邊各擊鎗立定作守城之勢各營把門人役赴中軍報守門無事訖聽大吹打開營門照常操號令放汲其汲者卽一刻照常操號令收回入城市蔬等項者分別市井遠近限定時辰到營外取齊照常操號令收進遲進及後出者罰每隊二名以上隊長同責各隊俱有者旗總同責照連坐例申時放汲一次號令俱同凡地方市賣之人許于營外三百步內聚爲一處札成街道委巡視官旗二名監守在彼聽軍士依令放出買辦飲食如有短價生事者卽時掣赴營內處治倍追給主仍貰耳遊營巡視官有犯加等一定樵探除暫時下營及初立營時舉樵探一次以後每閒一日一次于辰飯後正巳時聽中軍掌號一盪照常操號令每隊以一伍守營一伍出營限一箇時辰俱到營外候齊稟赴中軍掌號二盪仍各赴木城邊擊鎗如前方開四門放進查發如常操例

一撥伏路以各營司所向之方爲信地每面撥伏路兵五名爲一伏每伏半里每路五伏或一路二路三路每伏給銃三火箭六火繩二每一晝夜換班一次俱辰飯畢將應出之人赴中軍領令箭赴彼該回之人見面交代赴中軍銷報伏路者日則便驗往來真僞盤詰奸細遇有各衙門營寨公差人役欲赴本營者畫以一人伴至營門稟白夜則一人陪送到營外十步外止住先許陪來兵高聲說差人來歷守門人卽稟赴中軍聽令進止

一遇人畜行營之間行伍之內與劄定營後營盤四面不拘晝夜但有牲畜近營牆外者不許輕易差人出外牽取先報營將聽營將差塘健親兵領令箭由門外放出取進有人徑至牆外漸漸近前者喝令遠避如係公差人員喝令到門上候稟但報營外有人一面嚴行整備以待若十步之內喝之不退又不報姓名及言語不對者夜間卽開矢及發鳥銃射之日間差二人請令由門出縛來送營將報主將發落

一放廁所無賊處遠在營外百步間每一面總開大廁坑二口營內每一旗于隊後開小坑一口凡自外登廁員役由各營門將腰牌懸于門上方準開門而出回營到門將腰牌對認明白方許放入夜則大小解俱于營內小廁坑不許放一人出門天明吹打時遇起則埋之遇久住則打掃送出營外坑內遇賊近或對壘晝夜皆在營內

一辨巡箭遇夜另有巡箭主將發去不拘何處起凡箭過不許出聲只于守更之人身上敲一下失悞傳

接者軍法處治合營內兵足三營卽輪將官一員總巡每營輪把總一員巡本營每司輪哨官一員巡本司每哨輪旗總一人巡本哨每旗輪隊長一名巡本旗巡法嚴于三更四更五更

對壘號令

一重夜令與賊對壘之時更鋪失候夜巡失號止宿失火者斬無故叫呼奔走妄言賊至及驚營者斬卽賊來攻將士輒呼動者斬

一懲虛銃凡槍銃等手遇賊來不論遠近只聽中軍號砲一舉吹天鵝聲銃手放銃依令分爲幾層輪班點放著正平平對賊直射若賊成宗來每人只指定賊宗當中一賊打不聞中軍號砲響不吹天鵝聲便賊進營裏來也不許放銃先發者便一銃打死賊亦不準功必以軍法斬首平時火器收措不如法臨陣致藥溼線溼或不及然或終不然或不能然發者俱以軍法斬首把總以下知而不舉及姑息不治者連坐因而悞事者一體斬首

一申戰殲凡列陣須一息而定列時勿使敵知尤妙敵不知則用暗令列陣敵知則用明令列陣列畢火器在先擡陣在後或寇來沖我或列陣待我俟到五十步內火器聽令齊發只有一次次看起火各射火箭弓箭且行且射兵士乘火烟如雲一舉擁進須是飛走毋亂隊伍蜂叢蟻附如山崩如牆堵不可毫髮遲疑無有不勝此非擊殺之力乃火煙之勢飛進之雄奪其心目徑前交鋒彼自靡矣兵法謂勢險節短始如處女敵人開戶終如脫兔敵不及拒不其然乎自來兵見賊列陣一完便如此飛跑向前

沖去口中喊聲不絕中途決不住腳雖是強賊未有不敗者若賊見我兵方在列陣一擁先來我兵未有不奪氣者凡趨戰時正跑閒有跌倒一二或器械所累或腳步遲緩或一時發沙昏暈或爲矢石鉛子所中未必喪命便是父兄子弟且不必回顧健者只是跑向前殺敗了賊回兵收拾從容調理必可保全性命若不奮心向前且顧跌倒的稍遲延使賊又舉銃一輪所傷愈多被賊沖來大勢一敗不惟必竟救不出傷倒之兵且并健者亡之矣此萬萬急要一著蓋賊雖亦有鳥銃惟一跑向前不過一二發跑到身邊短器相接銃無所用矣若與賊各立定對打傷多氣奪再進不得也

一原軍法凡臨陣退縮許隊長割兵耳旗總割隊長耳哨長割旗總耳哨長徑將隊長斬首把總徑將哨長斬首若各故縱明視退縮不肯割斬者罪坐不肯割斬之人

一罰故避但有詐病故將軍器馬匹損壞及預先損失而臨陣方舉希圖免戰者斬首示衆仍查治本管旗隊人役

一處水陷凡軍前有水陷我前據高以待之候賊至陷中卽擊若賊不來則設伏退軍誘之

一徑山谷凡有山谷處遇戰必先設伏然後以兵誘之入伏兵攻之

一立逃約若遇逃走同隊之人各連坐以一半送監一半保掣革去月糧一年不獲原保人發哨三年本伍軍發落收伍支半糧獲日乃復

凡你們的耳只聽金聲眼只看旗幟夜看高燭雙燈如某色旗豎起點動便是某營兵收拾聽候號頭行營出戰不許聽人口說的言語擅起擅動若旗幟金鼓不動就是主將口說要如何也不許依從只是一味看旗鼓號令兵看各營把總的把總看中軍的如擂鼓該進就是前面有水有火若擂鼓不住便往水裏火裏也要前去如鳴金該退就是前面有金山銀山若金鳴不住也要依令退回必是這等大家共作一個眼共作一個耳共作一個心

守城軍法

每廠內一人不至或夜歸私家本犯捆打四十同槧同廠連坐遇賊攻打城池之時不到者本犯軍法示衆槧長割耳同隊同廠捆打旗廠器械矢口火銃鑼鼓一件不完者本犯自當二人不完者連坐槧長十槧以上連坐城長二十槧以上連坐雉長五十槧以上連坐城將若賊攻城之時以致缺少及放不如法者本犯軍法示衆炤前連坐者皆重治

一回頭者割耳

一擅動者割耳

一見賊大言喧華者或被傷大叫驚走者比炤臨陣退縮者軍法從事

一夜驚者治其所由同廠同槧本管者連坐

一中軍高處接應在外并墩堠號令遲悞者該管官重治瞭堠司號者軍法示衆

一各鋪內種火斷滅。與凡傳擊梆鑼鼓號起止不明。俱罪鋪長。

一伏路瞭望之人悞事致賊猝至者皆以軍法示衆。

一伏路之人已舉火號而中軍接應遲延或砲鬆不致大響以致閭城守城在廠之人聽聞不明及燈籠不亮致賊突到城下攻城登雉掌號鼓手瞭望人役以軍法示衆決不貸生。

舟師號令

一在港每日清晨中軍船內吹打通舉砲三聲擂鼓鳴金升太平旗各營司依序列于水面各擂鼓鳴金亦升太平旗。

一中軍船擂鼓立黃旗發櫓汲各船廳上岸買辦柴米及福神船具者赴中軍船給籌稟刻限時日回銷。敢有不行稟明私自擅離及該管隊長互相容隱知而不舉者一體連坐軍法治之倣陸軍號令行。各船領兵協總哨官捕柂兵夫風汛時日不許偷閒假托事故在岸歇宿虛竊錢糧致誤事機者一體軍法重治如有警掌行號已舉而未到船已起櫂而方來俱係畏避卽發保候無功者以軍法從事。各船柂隊長兵夫各安名分長幼尊卑務要同舟共命如父子兄弟相處不許嗜酒鬪毆違令喧華俱依軍法連坐然後另行發官問理曲直。

發船號令

一隔日先行牌諭各捕兵將出洋若干日該備兼米水數目限時查點欠者捆打罰賠本日掌第一號打

金邊各哨船出洋哨賊。掌二號俱照水寨常操例行。掌三號主將升船廳舉號砲三聲大吹打畢。一面起櫂起帆。一面吹號笛。只是官捕旗隊俱坐三板。赴中軍船下兩邊照營列下。不必入座。船布告官稟官旗到齊。放隨意發放所欲行之事畢。各官捕回船一體發放畢。中軍船擂鼓升行旗。舉號砲三聲。呐喊三次。依次開船。在洋行使。首尾相接。雁行而進。不許遠離柁哨。一船違令。捕盜之罪。二船違令。哨官之罪。四船違令。分總之罪。中軍畏縮。把總之罪。其柁工線手皆加倍重治。遇有船漏風水不便者。果出無心。非智力所及。覈實免罪。如有心爲之。故避征戰者。以軍法從事。

行泊號令

一凡設兵船水寨地方。預將各海船。洋巡哨船。所至處高山之巔。不拘幾處。各預採乾草在上。苦蓋的當。遇警急。哨船內兵夫。卽登山舉火。所在兵船。瞭見火光烟焰。就行開帆。望火前哨進勦。連近山頭及烽堠。卽時接舉傳報。以便寨哨發船策應。哨船乃探賊向。往蹤跡。親報領兵總協。以便進止。如火報不爽。使舟師成功。十級抽一賞。哨船逗遛悞事。罪坐該管領哨官員。若哨船不盡信地。止于一處探望。或在漁樵船隻人內取信。或到山放火。而原積草不足。火微不能瞭遠。致悞事者。哨長柁工隊長俱以軍法從事。

一我舟在洋出哨。追趕賊船。天欲昏黃。潮時將盡。不可貪程前往。須防今夜風起。無島收泊之處。遇龍潭神廟。不可放銃。吹打呐喊。或有驚動。起風作浪之失。早晚占看日月星雲氣色飛鳥。預知風雨來到。晚

黑便收島，高山四瞭，恐隔山先泊賊船，而我不知也。

一各船捕柁兵夫遇泊船山島無故不許上山閒游，恐遇警，一時下船不便，致有悞事。若要取水輪直兵夫赴中軍船告稟明白，照港給牌方許上山，違令者以軍法捆打。

夜行號令

一各船以燈火爲號，中軍船舉起火三枝，舉號砲三聲，上下一行懸燈五盞，無賊之處，各船懸燈二盞，遇有賊在前，所有燈籠盡數懸于船之四面，其桅上高燈專辦司哨，俱懸桅頂，前哨一盞，左哨二盞，平列后哨一盞，右哨二盞，平列，中哨三盞，上下列隨滅隨補，失悞錯亂者治其隊長。

一夜欲泊船，聽中軍舉號砲三聲，吹招柁喇叭，各船依序隨柁安插，不許私求穩便遠泊，因而疏虞，哨官連坐。

一守夜俱同在港號令，但每夜大船加烏銃手二名，狼機一架，百子號一架，小船只用烏銃手點火執銃，遇疑即便對放。

一各船遇夜有急，看中軍船舉號砲三聲，全燈懸起，每船燈俱盡懸起，以示勢衆。

水戰號令

退縮後至者罪，捕盜船行遲曲而後到者罪，捕盜柁工遇淺者罪，扳招手望賊減帆者罪，繚手捕盜船，雖先到而不直射賊船，傍邊擦過者，使風不正者俱罪，柁工繩手如已使逼賊船相并，不能成功，致賊舟

復走者罪。捕盜各隊長有能核查某兵不用力，即時割耳鎖縛在船，捕盜免罪。以上所謂罪者，係臨陣俱遵例斬首。

一禁逃。今每船內必用兵二三種人雖雜但同在一舟，毋憂不共命也。凡見賊輒逃跳水之兵未必頃刻閒便能遠我原船。其該船并鄰近船官捕隊長卽率別種兵或擲鏢或舉銃矢遠射擊之。如射賊同射擊死者以賊級論功行賞。

一敵人慮我官兵追戰，將船內器物遺棄水中。兵夫敢有撈拾不追賊者，許該船捕隊割耳示衆，故縱者連坐，事甯查治。

一凡已打敗賊舟一隻而餘舟不行分頭追打別賊，共相攢來爭榜首級致賊逼走者，各船獲級俱止歸先打賊敗一船之功，餘船捕盜皆斬。曾同用力者不在此例。

一各船打敗倭寇所擄獲財物包裹，聽該船捕盜從公分給，以大半分動手首功之人，餘皆均取。敢有官捕頭目勒分甚至夾打追侵公然放肆者，許各兵徑于回日赴官告首，決行重治加倍追付各兵頭目依法科罪。其軍器則要報官解驗，不許各兵隱藏。

一各船遇賊，凡有一船吹天鵝喇叭聲，各船通要鳴鼓齊大吶喊以壯軍威。一各船遇警，捕舵兵夫不許解衣而臥，違令查出治以軍法。



晉兵補志

錢儀吉撰

本館據史學叢書
本排印初編各叢
書僅有此本

補晉吳志

補晉兵志

清 嘉興錢儀吉撰

晉初宿衛禁兵有七軍五校七軍者左衛右衛前軍後軍左軍右軍驍騎也唐六典注云泰始元年使中領軍將軍羊祜統二衛前後左右驍騎等七軍營兵祜傳云祜悉統宿衛入直殿中太平御覽引王隱晉書亦云羊祜爲中軍將軍統宿衛是七軍皆宿衛之證總統之其前後左右亦稱四軍晉職官志云魏明帝時有左軍右軍泰始八年又置後軍是爲四軍武帝初又置前五校者屯騎越騎步兵長水射聲也各領千兵爲營太平御覽引陶氏職官要錄云五校晉承漢置以爲宿衛官謂五營也是五皆在城中閒居賦注又引陸機洛陽記云五營皆在城中校尉前後左右將軍府皆在城中又有翊軍營爲王濬置也濬平吳還欲以爲五官校尉而無缺始置翊軍校尉而以梁益所省兵爲營太平御覽引王隱晉書之言如此拜翊軍校尉云拜輔國大將軍領步兵校尉舊校唯五之有步兵自漢已然不得謂吳平始置故以王隱之言爲可信而徙翊軍亦在吳平與濬平同時疑亦誤也又武紀太康六年六月初置翊軍校尉官太平御覽引王隱晉書唐彬傳云吳平徵此傳云遷積弩將軍領宿衛兵是積弩典宿衛之證又文獻通考云十五年立射營弩營而二衛所領各有三部司馬五部督前驅由基強弩爲三司馬命中虎賁羽林上騎異力爲五督也見職官志沈約宋志云晉武帝時殿內宿衛之部司馬是知三部五部皆宿衛之士宿衛之職官志乃東晉案以游擊爲六軍號曰三正言虎賁隸左隸右者之異號耳左衛無集虎賁右衛佽飛虎賁其命中虎賁驍騎游擊亦各領之

有文。擬補兗州。詔答曰。沖領兵未欲出之。是亦領京兵也。精果其城外諸軍。則中護軍統之。武
本紀云。泰始元年十一月。初置四護軍以統城外諸軍。四字疑當作中。故賈充傳云。轉中護
軍。統城外諸軍也。又王沈傳云。轉驃騎將軍。統城外諸軍事。是驃騎。亦統城外軍也。
而領護又各領營兵。見職官志。西朝京城之兵蓋如此。武帝甚重兵官。故軍校多選清望職官。而諸府軍士
去留皆制旨所及。王尼傳云。尼爲護軍府軍士。胡母輔之與王澄。傅暢。劉與。荀邃。裴當
遷。逃屬河南功曹甄述。及洛陽令曹據。請解之。據等以制旨所及不敢。當
吳未平。詔州郡舉勇猛秀異之才。十二月。公卿以下舉將帥各一人。俱見本紀。泰始九年十一月
丁酉。帝臨宣武觀。大閱諸軍。甲辰乃罷。其後頻歲冬大閱。其兵簿凡三十六軍。見武紀及秦
東傳。咸寧五年。乃東西大舉以伐吳。衆二十餘萬。明年平之。收其圖籍。得兵二十三萬。五月。詔諸士卒年六十以上罷歸家。
並見本紀。定製。男子年十六以上至六十爲正丁。十五以下至十三六十一以上至六十五爲次丁。十二以
下六十六以上爲老小。不事。晉食貨志。淮南相劉頤言。昔魏武帝分離天下。使人役居戶各在一方。旣事勢
所須。且曲爲權假。一時以赴所務。非正典也。遂巡至今。積年未改。百姓雖身丁其困。而私怨不生。誠以三
方未并。時未可以求安故也。至平吳之日。天下懷靜。而東南二方六州郡兵將士武吏戍守江表。或給京
城。運漕。父南子北。室家分離。咸更不寧。又不習水土。運役勤瘁。有死亡之患。勢不可久。宜大見處分。以副
人望。魏氏錯役。亦應改舊。自董卓至今。近出百年。四海勤瘁。丁難極矣。六合混并。始於今日。兆庶思寧。非
虛望也。古今異宜。所遇不同。誠亦未可希遵。在昔。息放馬牛。然使受百役者不出其國。兵備待事其鄉。縱

復不得悉然爲之苟盡其理可盡三分之二吏役不出千里之外如斯而天下所蒙已不訾矣帝優詔答之頌傳初馮紇領汝南太守以郡兵隨王濬入秣陵有功紇傳天下既一統於是詔罷軍役示海內大安遂悉去州郡兵大郡置武吏百人小郡五十人而已山濬傳冠軍將軍交州牧陶璜言交土荒裔斗絕一方或重譯而言連帶山海又南郡去州海行千有餘里外距林邑纔七百里夷帥范熊世爲逋寇自稱爲王數攻百姓且連接扶南種類猥多朋黨相倚負險不賓往隸吳時數作寇逆臣以眩驚昔爲故國所采偏戌在南十有餘年雖前後征討翦其魁桀深山僻穴尚有逋竄又臣所統之卒本七千餘人南土溫溼多有氣毒加累年征討死亡減耗其見在者二千四百二十人今四海混同無思不服當卷甲消刃禮樂是務而此州之人識義者寡厭其安樂好爲禍亂又廣州南岸周旋六千餘里不賓屬者乃五萬餘戶及桂林不羈之輩復當萬戶至於服從官役纔五千餘家二州唇齒唯兵是鎮又寧州興古接據上流去交趾郡千六百里水陸並通互相維衛州兵未宜約損以示單虛從之故交廣寧州猶有兵數千人璜傳山濬嘗因從講武宣武場與盧欽論用兵之本以爲不宜去州郡武備時以濬不學孫吳而闇與之合帝亦稱之曰天下名言也而不能用濬傳而諸王國皆置軍大國王三軍中軍二千人上下軍各千五百人次國二軍上軍二千人下軍千人郡王制度如小國王郡侯如不滿五千戶王並置一軍千一百人縣王如郡侯亦一軍而諸王之支庶推恩封者公如五千戶國侯如不滿五千戶國亦各一軍千人皆中尉領之職

• 八王之兵由此起。初，裴頠請增置太子後衛率，吏給三千兵。於是東宮宿衛萬人，而愍懷竟廢。頠傳及楊駿以後父輔政，宿殿中有左右衛三部司馬各二十人，殿中都尉十人，皆持兵出入。駿多樹親黨領禁兵，怙肆之端見矣。駿傳駿誅，而督將侯者千八百人。在永平元年三月，及河間成都討長沙王乂逼京師，王師不利，乃發王公奴婢手眷給兵廩，一品已下不從征者，男子十三以上皆從役。又發奴爲兵，亦號爲四部司馬，以奴爲兵自此始矣。在太安二年八月，頠遣從事中郎盛夔等以兵五萬屯十二城門，悉殺殿中宿所忌者，而以三部兵代宿衛。永興元年並惠紀。及東海王越專政，又以頠興事皆由殿省，乃奏宿衛有侯爵者皆罷之。殿中武官先皆封侯，則皆涕泣去。而殿中軍略盡矣，乃以東海國官領左右衛，以國兵爲宿衛。文獻通考。自是之後，禁兵外散於四方，劉石蹂躪州郡，曾無藩籬之固。千寶晉紀總論見文選。愍帝繼統，衆唯一旅。愍紀而元帝猶以國兵興建業，丁潭上書曰：夫兵所以防禦未然，鎮壓奸凶，周雖三聖，功成由武。今戎戰之世，益宜留心簡選精銳，以備不虞。無事則優其身，有難則責其力。竊聞今之兵士，或私有役使，而營陣不充。夫爲國者，猶爲家也。計財力之所任，審趨舍之舉動，不營難成之功，損棄分外之役。今兵人未強，當審其宜，經塗遠舉，未獻大捷，更使力單財盡，而威望挫弱也。丁潭傳時江東草創，盜賊多有，或欲使諸縣領兵，賀循以為令長威弱，而兼才難備，發憚役之人，而御之不肅，未必爲用。以循所聞，江中劇地，惟有閩廬一處，地勢險奧，亡逃所聚，特宜以重兵備戍，隨勢討除，絕其根蒂。沿江諸縣各有分界，分界之內，長官所任，自可度。

士分力多置亭候恆使徼行峻其綱目嚴其刑賞使越常科勤則有殊榮之報墮則有一身之罪謂於大
理不得不肅所給人以時番休役不至困代易有期按漢制十里一亭今縱不能爾要宜籌量使力足相
周若寇劫彊多不能獨制者可指其蹤迹言所在都督尋當致討今不明部分使所在百姓與軍家雜其
徼備兩情俱墮莫適任負所以徒有備名不能益也帝從之賀循傳太興二年虞預言今周撫陳川相係背
叛徐龜驕黠放兵侵掠豫備不虞古之善教矧乃有虞可不爲防爲防之術宜得良將將不素簡無以應
敵願陛下諸之羣公博稽於衆若當局之才必尤其任則宜獎厲使不顧命旁料尤猥或有可者厚加寵
待足令忘身昔英布見慢恚欲自裁出觀供置然後致力禮遇之恩可不隆哉虞預傳於是兵益少用尚書
刁協言悉以奴爲兵刁協傳詔曰昔漢二祖及魏武皆免良人武帝時涼州覆敗諸爲奴婢亦皆復籍此累
代成規也其免中州良人遭難爲揚州諸郡僮客者以備征役在太興四年五月見元紀於是戴淵以征西將軍都
督兗豫幽冀雍并六州諸軍事發投刺王官千人爲軍吏而調揚州百姓家奴爲兵配之亦僅萬人戴淵傳
然自後有所征討大抵皆發僮奴王敦領荊州將爲亂憚周訪在梁州不敢發訪卒敦反遂入京師逾月
還武昌鎮無敢誰何者太寧初復入寇京師已而敦死王敦傳時軍校多無兵咸和初劉超爲射聲校尉乃
以義興人多義隨超統其衆宿衛號爲君子營義隨爲兵自此始劉超傳及蘇峻祖約反荊州陶侃江州溫
嶠徐州郗鑒皆以方鎮兵討擊之見陶侃傳而宣城內史桓彝糾合義壯猶以郡兵破賊別帥桓彝傳然殿中

兵多逃亡。孔坦傳云·坦遷吳興內史·募江淮流人爲軍·有殿中兵·因亂東遷·來應坦募·坦不知而納之·或諷朝廷以坦藏臺無兵·坐免·而左衛將軍陳光有兵五千請伐胡。詔令攻壽陽。蔡謨曰：此五千人皆王都精銳之衆。光爲左衛。遠近聞之。名爲殿中軍。宜令所向有征無戰。而頓之堅城之下。勝之不武。不勝爲笑。蔡謨傳及咸康末。庾冰爲中書監。隱實戶口。料出無名萬餘人。稍以充軍實。隱戶爲兵。自此始。見冰傳·又毛璩傳云·璩遷寧朔將軍淮南太守·海陵縣界·地名青蒲·四面湖澤·皆是蠶葑逃亡所聚·璩率子人討之。時大旱。璩因放火。獄誅盡然。璩自首·近有萬戶·皆以補兵·朝廷嘉之·按此在安帝時建元初。庾翼以荊州刺史都督江荆司雍梁益六州諸軍事。悉發所統州奴。及車牛驢馬。請北伐石季龍。有衆四萬。朝議不同。卒無成。翼傳哀帝時。王彪之言宿衛之重。二衛任之。其次驍騎左軍各有所領。無兵軍校。皆應罷廢。四軍皆罷。則左軍之名不宜獨立。宜改遊擊。以對驍騎。王彪之傳於是詔改左軍將軍爲遊擊將軍。罷右軍前軍後軍將軍五校三將官。在興寧二年二月·見哀紀及咸安元年。桓溫入京師。毛安之乃以魏郡太守帥所領宿衛殿中。明年下詔曰：每念干戈未戢。公私疲憊。藩鎮有疆理之務。征戍懷東山之勤。或白首戎陣。忠勞未斂。或行役彌久。備石靡儲。何嘗不昧旦晨。興夜分忘寢。雖未能撫而巡之。且欲達其此心。可遣大使詣大司馬。並問方伯。逮於邊戍。宣詔大饗。求其所安。又籌量賜給。悉令周普。並簡文紀太元初。謝元鎮廣陵。多募勁勇。劉牢之、何謙、諸葛侃、高衡、劉軌、田洛、孫無終等皆應選。元以牢之爲參軍。領精銳爲前鋒。百戰百勝。所謂北府兵也。卒以之破苻堅於肥水。劉牢之傳而方鎮之兵日盛。而鎮將去官。又有送故。范甯以爲言曰：方鎮去官。皆割

精兵器仗以爲送故送兵多者千餘家少者數十戶既力入私門復資官廩布兵役既竭枉服良人牽引無端以相充補若功勳之臣已享裂土之祚豈應封外復置吏兵乎謂送故之格宜爲節制以三年爲斷官制謫兵不相襲代頃者小事便以補役一愆之違辱及累世親戚傍支罹其禍毒戶口減耗亦由於此皆宜料遣以全國信不行范甯傳會稽王道子用事王國寶加後將軍丹陽尹道子乃以東宮兵悉配之王國寶傳及會稽世子元顯代父任桓元肆逆劉牢之爲元顯前鋒討之而牢之叛降於元王師敗劉裕以建武將軍起義兵誅元遂以方鎮移晉祚云